

### *ASO LULU, 08 MATI 2023*

*Na nofoia e le Fofoga Fetalai le Nofoa i le itula e 9:31 i le taeao.*

Tatalo.

**FOFOGA FETALAI:** Ou te faasilasila atu ua amatalia nei Taulumaga a le Fono Aoao Faitulafono.

E faatalofa atu i tulaga aloaia i lenei taeao fou i le paia o le Palemene, i le afio o lau afioga i le Tamaitai Palemia, afio lau Afioga i le Sui Palemia, afifio a outou Afioga i Alii ma Tamaitai Minisita o le Kapeneta, tainane a outou Afioga i Minisita Lagolago.

Afio foi lau Afioga i le Taitai o le Itu Agai faapea foi sui usufono mamalu uma o le Palemene. Faafetai i le Atua i Lana tausiga ma Lana puipuiga i lo outou soifua ma so matou foi malosi, lenei ua mafai ai ona tatou toe fesilafai i manuia i lenei taeao mo le faaauauina o galuega e tusa o lo tatou valaauina. Viia le Atua, malo le soifua manuia ma le lagi e mama.

E i ai nisi o sui usufono ua tatou le mafuta i lenei taeao ona o tuatuaia le maalofia faapea foi le le atoatoa o le malosi, ia manatua ane i lau tatalo, ae tatou talosia ia i le alofa o le Atua i se aso tatou te toe feiloai ai i Lona toafilemu.

E faatalofa atu foi i Ofisa Sili o Pulega o Matagaluega ma Faalapotopotoga Tumaoti a le tatou Malo ua mafai ona tatou auai faatasi mo le lagolagoina o le alofaiva o le tatou Maota. Malo le onosai, faafetai le faatauina o lo outou valaauina.

Ua tatou mafuta foi ma nisi o sui o le atunuu ua afifio mai e fia molimau i tatou taulumaga. Faatalofa atu, malo le soifua manuia.

Le tapuaiga a Samoa i ona tulaga faalupelupeina, e ofo alofa ma faatalofa atu i lenei taeao manuia. Ia manuia lau tapuaiga mo le alofaiva o lau Palemene i lenei aso.

E i ai le manatu o lea o le a sii le vaa o le tatou Maota i le vasa i lenei taeao, na o se tuualalo a le Fofoga Fetalai, ia tafatafafuga i le Atua lo outou finagalo. Ua molimauina lava ma le loto fiafia le toafilemu o tatou felafolafoaiga, e le tau selu atu, leaga e le tauilo le tofa a le tupu, a o le sa folau foi o le Palemene, e tila le tofa, e taumua i le utaga loloto ae too i le finagalo o le Atua.

Le alofaiva o le tatou Maota i lenei taeao, ia i ai le agalelei o le Atua. Ia manuia tele le usugafono a sui usufono mamalu uma o le tatou Maota.

**ILOILOGA O LIPOTI A KOMITI FAA-PALEMENE MA TALII A  
LE MALO**

**P.P.2022/2023 NU.11, LIPOTI A LE KOMITI O TUPE MAUA MA  
TUPE TOTOGI I LE P.P.2020/2021 NU.106 MA LE P.P.2021/2022  
NU.24, LIPOTI FAALETAUSAGA A LE FALETUPE TUTOTONU  
O SAMOA MO TAUSAGA FAALETUPE 2019/2020 MA LE  
2020/2021**

**P.P.2022/2023 NU.61, TALII A LE MALO I LE P.P.2022/2023 NU.11,  
LIPOTI A LE KOMITI O TUPE MAUA MA TUPE TOTOGI I LE  
P.P.2020/2021 NU.106 MA LE P.P.2021/2022 NU.24, LIPOTI  
FAALETAUSAGA A LE FALETUPE TUTOTONU O SAMOA MO  
TAUSAGA FAALETUPE 2019/2020 MA LE 2020/2021 – ILOILOGA**

**FOFOGA FETALAI:** E tolopo Taulumaga a le Fono Aoaofaitulafono i le aso ananafi ua maea folasia Tali a le Malo e le Afioga i le Sui Minisita o le Faletupe Tutotonu o Samoa e faatatau i fautuaga a le Komiti o Tupe Maua ma Tupe Totogi.

Ia, o le avanoa lenei e tuuina atu ai mo se sui usufono e fia saunoa i le Lipoti a le Komiti ma Tali a le tatou Malo.

Ia, o lea ua maitau atu o lea ua fou mai le sa o lau Afioga i le Taitai o le Itu Agai. Tulai mai lau Afioga.

**Tofa Hon LAUOFO FONOTOE NUAFESILI PIERRE LAUOFO (Taitai o le Itu Agai):** Ia, faafetai i lau Afioga i le Fofoga Fetalai. E faatalofa atu i lenei taeao fou. Malo le maleifua mai i pue o manu. E faapena foi ona faatalofa atu i le Afioga i le Palemia ma le Sui Palemia ma le la Itu, afioga i Minisita ma Minisita Lagolago, aemaise foi le Afioga i le Sui Fofoga Fetalai.

Ia, liliu mai i lenei Itu o le Maota, faamalo foi le folau i Afioga i sui usufono. Ia, le tapuaiga a le atunuu, ua faamalo le folau, faafetai i la outou tapuaiga. Le itupa gafua i auauna tofofi a le Atua, faamalo tatalo, aua ni manu mo Samoa. Ia e faamalo foi faafetai i Ofisa Sili o Pulega o Matagaluega i le faatinoina o le latou pitolaau ua tatou faatasi i lenei taeao e lagolagosua i le tatou galuega. Ua faamalo faafetai.

E le tele foi se manatu e tusa ai ma Lipoti Faaletausaga pei ona faasolo i ai le tatou galuega i lenei foi taeao. O lea ua matauina lau Afioga i le Minisita, e pei lava ona silafia o Lipoti ia o le 2019/2020 ma le 2020/2021. O le tulaga lea pei ona matauina i le 2019/2020 i le tulaga o tupe maua e tatou tagata tafafao maimoa mai fafo, sa ausia le \$375 miliona tala mai le atinae lea o tagata tafafao maimoa mai fafo. Peitai, i le tausaga faaletupe na sosoo ai ma le faagasolo mai i vaitaimi o aafia ai tatou i le faamai o le

Koviti-19, ua pau i le leai o se tupe, leai se tupe maua mai tagata tafafao maimoa mai fafo.

Ia e pei lava ona silafia e le o po se lilo i le tulaga sa taofia ai tatou borders, sa tapu le tulaga o femalagaaiga sa i ai ma le tele o isi foi vavao, ia po o SOEs i lena foi vaitaimi i le tatou State of Emergency sa i ai. Ia pei o le mafuaaga lena. Ua afua ona afea se tala i lenei taeao ona e pei lava foi sa ou tuitui atu foi i isi a tatou fonotaga ua tuanai, e lelei le toe lalaga mai o le atinae lea, aua o le atinae lemei e manuia ai, e le gata ia i latou e nonofo i Apia, a o le atunuu atoa. Aua o tagata tafafao mai Samoa, e agai i tua, i Savaii, mataaga eseese ma faatau oloa e faatau i flea maketi i auala, o tafaala, faapea foi le faaoga ai o faletalimalo i afioaga i tua ma Savaii. O le taua lena o le atinae lenei ona e faasafua i le atunuu ia manuia, o tupe e omai ma turisi e faapena ona manuia ai le tele o tagata o le tatou atunuu. E faapea foi i afioaga o lo o faapena ona i ai o latou mataaga o lo o maua e latou tupe mai tagata tafafao maimoa mai.

Ia o lea ua tatala tatou femalagaaiga, ia, e pei o le tulaga lea e tatalogo pea masefau, ia silasila ane i tatou atinae ia o faletalimalo e tatau ona toe fai i ai se fuafuaga, oan o le tele o faletalimalo nei sa le gafatia ona toe totogi aitalafu po o nonogatupe ma aitalafu ona o le vaitaimi lea sa tapunia tatou borders pe a ma le 2 tausaga, aafia ai foi ma le tele o galuega, e tele latou sa galulue i faletalimalo ma i latou sa galulue i le Tourism Industry sa aafia foi a latou galuega. Ae se i silasila ane lau Afioga i le Taitaifono o le Komiti, ia faapea foi lau Afioga i le Minisita i ia faamanuiaga e tatau ona toe maua e le tatou atunuu.

E faapea foi le tulaga o le siitia i luga o tatou tupe faamomoli mai fafo lea foi e matau i le piriota lea ua siitia mai le \$567 miliona i le \$606 miliona tupe faamomoli mai fafo. O le mea sa matauina i le 2 tausaga o feagai tatou ma vavao o le Koviti-19, sa matauina le sii i luga o tupe faamomoli mai fafo, ai ona o le tulaga foi lea ua le mafai ona toe feoai pe malaga mai o tatou tagata o lo o nonofo i fafo i faalavelave ma tulaga faapena, a o lea sa toaga e lafo mai le seleni. O le tupe taua lea mo le tatou atunuu aua o lea foi e matau atu po o le 20% o le tatou Gross Domestic Product e maua mai le tatou remittances po o tupe faamomoli mai fafo. Faafetai i lea piriota ma lea vaitaimi, ma e talitonu o le tulaga lava lena o lo o i ai i lenei foi vaitau o tatou i ai, e le o sopoia le alafua o le pasene o aitalafu i fafo o le tatou external debt, o lea lava o lo o taofiofi i lalo i le 50%. A o se tulaga fiafia foi lena i le matau atu i ai.

Na pau lava le vaega se i toe silasila ane lau Afioga, o le tatou inflation, po o a ni vaega se i toe silasila i ai i le pau o le tatou tamaoaiga, aua o le taimi lea o le 2019 i le 2020, sa 1.5%. O le tulaga lea sa i ai i le tausaga pei ona sosoo ane ai, na pau i le -3.5%, le tulaga faapena sa i ai, -3.0%. I le taimi nei, pei lava o lea tatou te vaavaai i le -11 i le -12%. Atonu o le mafuaaga foi lea o letaugata o letau o le soifuaga o lo o i ai i lenei foi

vaitau. E pei o le mafuaaga lea o le afea o lea vaega i sau taumafai atu, ona se i silasila ona o le tau foi o le soifuaga ua fai si taugata i lenei vaitau. A o vaega ia e tatau ona mataitu ina ia taumafai e aumai i lalo ma oo ai i se tulaga lelei le tatou tamaoaiga.

O tupe foi pei ona i ai o tatou oloa mai fafo po o tatou foreign reserves, ia o lea sa manaia foi lea vaitau sa au atu lava i le 8 masina tatou tupe faaagaaga i fafo mo le okaina mai o oloa i totonu o le atunuu. O lena sa matauina sa lelei. Atonu o le tulaga lena o lo o i ai i le taimi nei ua tatou toe foi i se tulaga latalata i ai i le vaega lea pei ona faapena. Ona o lea tatou te i ai i le taimi lenei o le process, o lea tatou te agai i le taimi lenei e faasolo le recovery, e toe taumafai mai e toe aumai i luga ma toe lalaga i luga tatou atinae. O lona ua tatau ona tatou galulue ia siitia i luga ina ia toe ausia pe sili atu ia vaitau ae le i aafia tatou i le faamai o le Koviti-19.

Lau Afioga i le Fofoga Fetalai, e pei na o ni nai manatu pupuu ia e folasia atu e tusa ai ma Lipoti Faaletausaga a le tatou Faletupe Tutotonu. Faafetai mo le avanoa.

**FOFOGA FETALAI:** Malo saunoa. Faafetai foi mo lou sao, aua lava le Lipoti a le tatou Komiti aemaise foi o le faafogafoga mai a le Minisita ma le tatou Malo. Malo saunoa.

Ia o lea ua matau atu ua fou mai le sa o le sui usufono mamalu mai Vaimauga 1.

**Afioga SULAMANAIA FETAIAI TAUILIILI TUIVASA (Vaimauga 1):** Masalo e faatalofa atu lenei itumalo i le paia o lenei Maota, i le afio o lau Afioga i le Fofoga Fetalai. Faamalo mo le faatautaiga o le Fonousu a le atunuu, mai ananafi e oo mai lenei taeao, faamalo le onosai, faamalo foi le faapalepale. E faapena foi i lena tala na atoa i le afio mai o lau Afioga i le Tamaitai Palemia, Sui Palemia, aemaise o Afioga i Alii ma Tamaitai Minisita o le Kapeneta, aemaise o Minisita Lagolago. Faamalo. Faamalo i lo outou valaauina ma le tautuaina o si o tatou atunuu.

E faatalofa foi lenei itumalo i le alafai mai o lau Afioga i le Taitai o le Itu Agai i lau fetalaiga Lauofo Fonotoe aemaise foi o le paia i le afio atu o alii ma tamaitai sui usufono o le Palemene i lenei itu.

E avea foi lenei itula lau Afioga i le Fofoga Fetalai e faatalofa atu ai foi lenei itumalo i Ofisa Sili o Pulega o Matagaluega ma Faalapotopotoga Tumaoti o si o tatou atunuu ma Pisinisi, faamalo i le tautuaina o si o tatou atunuu.

E faapitoa foi le faatalofa a lenei itumalo lau Afioga i le Fofoga Fetalai ia i latou foi ua tofia e avea ma Ofisa Sili o Pulega a le Matagaluega o le Malo, aemaise foi ua maua foi tala ua tofia le Pule o le NUS, ia viia le Atua i lenei foi tamalii ua leva ona e tautua ai i lena foi valaauina. Ia, o ou mama na, aemaise foi o le tulai mai o i latou nei e tautuaina le tatou Malo.

Aemaise foi le Ofisa Sili o Pulega o le Matagaluega o Faamasinoga, Papalii ma lena itu, ia, o outou mama na. Aemaise le Pulega ma le vaai atu, o i inei e agai mai i ai outou mo le lumanai, e lima ma vae i ai le Palemene.

Ia, si ou itumalo, tapuai maia se i fai se tatou sao i le taua o le Lipoti a le Taitaifono a le Komiti o Tupe. E momoli le agaga faafetai o lenei itumalo i le Afioga i le Tamaitai Kovana, aemaise o le Ofisa o le Central Bank, le Pulega aemaise foi o le Komiti Faatonu, ona a matau lava ma le totoa i le faamoemoega o le Central Bank po o le Ofisa Tutotonu o lenei faletupe, ia siitia tulaga tau tupe, nonogatupe ma aiaiga o le fesuaiga o tupe, ina ia lilifa i le faaleleia o le atinae o le tamaoaiga o Samoa. O le vaaiga taulai ia avea ma faletupe e piiama i suiga lelei ma talafeagai e opogi ai le gafataulimaina ma le manuia o le tamaoaiga o Samoa. A o le manulauti la, fai mai e faafailele le faiga tau tupe lelei, malosi ma uluola ma le atinaeina o le tamaoaiga o Samoa. Masalo o le malosiaga lena o le Palemene lenei, e tua i fautuaga tuuina mai e le faletupe tutotonu o Samoa i le tamaoaiga e fua i ai le atunuu lenei o Samoa. O le ala lea e matua taulia ai lava lenei Matagaluega po o itutino o le Malo, le Ofisa Tutotonu o Tupe o si o tatou atunuu po o le Central Bank i lenei itumalo.

E matau lava ma le totoa le tulaga i le matamata atu a lenei itumalo i le Tala Faaletupe ua aumai, faamalo i le Komiti sa faatinoina, 2019/2020, 2020/2021. O le tele o atunuu e fesiligia lava mea o tala faatatau o tupe aemaise o Lipoti a Matagaluega o le Malo ma Faalapotopotoga e tuuina mai i totonu. A o le agaga fiafia lava o lenei itumalo i le matamata ua uma ona fai i ai le galuega a le Okika, e oo mai lava i le Lipoti i le Tausaga Faaletupe lea 2021/2022, ua uma ona fai i ai le opinion a le Okika. O le agaga faafetai lena i lau Afioga i le Fofoga Fetalai, ona e tele ia o faigamalo lelei e fesiligia po o a mai tulaga sa faatino ai. Ae o le agaga faafetai lava o lou sui usufono ma lenei itumalo, o lea e manino lava mea uma, o lea foi ua uma ona fai i ai ma silasila i ai le au Okika i le tulaga o lo o faagaluaeina ai le tulaga i le Kovana ma lana Matagaluega po o lea itutino o le Malo. Ia e leai lava se mea o gase, ona e fua le tatou tamaoaiga ma le tulaga o si o tatoua tunuu i le tuualalo mai ma aumai fuainumera, aemaise lava o le tamaoaiga lea e lipoti ma tuuina mai. Aemaise foi e talia e lenei itumalo fautuaga, aemaise lava le tulaga lea ua fautua ai le Komiti i ni nai penefiti ona o lea e matau sa i ai foi tulaga faapena i tausaga ua tuana'i. Ia alu alu foi a o lea foi ua toe aumai ni fautuaga, o ni fautuaga na i lou foi sui usufono ina ia mafai ona maua nai faamanuiaga mo le aufaigaluega ona e le o po se lilo, o le Central Bank o le Bank autu lea e tua uma i ai Banks uma o Samoa. Ia e mataga la le aufaigaluega ae o toe nono i isi Bank po o a foi tulaga a o le Bank autu. E lagolagoina ai e lenei itumalo le fautuaga taua lea a le Komiti.

A silasila foi lenei Maota lau Afioga i le Fofoga Fetalai i le aufaigaluega o lo o galulue ai, ia e momoli lava le agaga faafetai i tamalii foi ma tupu i

le matutua o le soifua o lo o i ai, o le umi ia ona faigaluega ai, sa ta vaai lava i aso la o faigaluega, e oo mai lava i le taimi lenei. O i lea e i ai se pine faamau, o lea foi la ua agai mai nai alo ma fanau mai fafo ma o atu ai, ia o lo o faasoa i ai le tamaoaiga. O le lagolagoina lena e lenei itumalo o le fautuaga taua lena ina ia faamatu ni penefiti i le aufaigaluega.

O le tulaga foi i le tulaga lea ua talosaga mai ai i le Koviti-19, ia e le te i te i foi tupu lena mea, o le agaga lava o le faafetai e silafia uma lava e le Atua. O nisi na faanoanoa ina ua tupu le Koviti-19, a o nisi pisinisi na talanoa mai, aemaise lava le tulaga lea i le faatinoina o le mea o le media, fai mai faafetai ua tupu le Koviti-19 ua create ai nisi pisinisi fou. E pei o mea ia e le o po se lilo o faalauiloa lava ia o tusigaigoa ma mea o sailigatupe o tausala, ua le toe mafai ona toe malaga tagata i fafo, ave ietoga, ua faatino lava tausala ia i luga o upegatafailagi ia e fai atu lava i inei i Samoa. Ona o le a? Ona ua fanau mai i le taimi o le Koviti-19 le felauaiga o malaga ma le taofia o malaga. E pei o le agaga lena e faafetai ai lenei sui usufono.

Lau Afioga i le Fofoga Fetalai, e lagolagoina e lenei sui usufono fautuaga ua aumai ma le faafetai a lenei itumalo, ua uma ona silasila i ai Okika. O le mea taua lava lena. Ae pau lava le tuualalo a lenei itumalo i le Afioga i le Taitaifono, po o i ai ni avanoa e le i faatumuina, aua o le isi malosiaga lena o le tele o Matagaluga foi a le Malo, e uma lava e toe faafoi lava tupe i totonu ona e le i faatumuina ni avanoa. Na pau lava lena o le fesili, pe i ai ni avanoa o avanoa pea i totonu o lenei... e le i faatumuina.

Lau Afioga i le Fofoga Fetalai, e le tele se sao o lenei itumalo, a o le agaga e lagolagoina e lenei itumalo le Lipoti matagofie.

E avea foi lenei itula lau Afioga i le Fofoga Fetalai e avatu ai foi se faafetai a lenei itumalo i le Afioga i le Minisita o Felauaiga aemaise o le LTA le Afioga ia Olo, ua fiafia lenei itumalo ua faatino matou galuega, e ala i matou auala galue i le nuu lea o Fagalii. E momoli le agaga faafetai i lau Afioga i le Minisita i lou manatu ifo i le ta nuu, ua fiafia lava ua faauma le auala lea e alu i uta, ae faapena foi ia Vaialele. Ae toe tuu atu lava le avanoa i ou autafa, Letogo lena lea po ua fai le tender o auala o Letogo, ia ma si tatou nuu o Lailii, le pitonuu mai o Lailii ae afio atu ai pe a uma le fonotaga lenei, ua le o tagata, le mea lea e i ai le pulenuu o Lailii, ua le sao auala, ia le taligalu lena sa ioe mai i ai le Afioga i le... Ia pei o nai avanoa na, o lea e avatu leaga o lea o le...

**Afioga Hon Fiamē Naomi Mataafa (Palemia):** Lau Afioga i le Fofoga Fetalai o le mea e fia faasao...

**Afioga SULAMANAIA FETAIAI TAUILIILI TUIVASA:** A ua maua le avanoa o le itumalo, e momoli le agaga faafetai Olo i au galuega o lo o

faatinoina i lenei itumalo. Ia manuia lau Afioga i le Fofoga Fetalai ma le Maota.

**FOFOGA FETALAI:** Malie lau Afioga i le sui usufono mamalu...

**Afioga Hon Fiamē Naomi Mataafa:** Faafetai tele lava o lo o fai galuega a itumalo o le sui usufono, ae faamolemole, se i tatou talanoa i tatou Lipoti ia e i luga o le tatou Laulau. Atonu e i ai se taimi talanoaina le galuega a le LTA. Ma le faaaloalo lava.

**FOFOGA FETALAI:** Malo faafetai, o lea ua faauma mai lau saunoaga.

**Afioga SULAMANAIA FETAIAI TAUILIILI TUIVASA:** Ioe, o le upu a le atunuu a malie lava se pese ta te fia siva lava. O le agaga lena o lea ua faaoga ai e le itumalo lenei lenei avanoa e momoli ai le agaga o le faafetai. Ma o lea ua talia aloaia e lenei itumalo le Lipoti a le Komiti o Tupe.

**FOFOGA FETALAI:** Malo faafetai. Ia malo lava i le sui usufono mamalu o lea ua maua lou finagalo ma le lagolagoina foi o fautuaga matagofie a le Komiti. Malo faafetai, o lea foi ua faafogafoga mai le Taitaifono ma le Matagaluega ua faapea ona i ai le lagolagoina a lau Afioga i le sui usufono mamalu. O le mea lea, malo faafetai, malo saunoa.

E matau atu o lea ua... oi, ia, se i tulai mai lava le sui usufono mo Falelatai ma Samatau. Lau Afioga i le sui usufono mamalu.

**Afioga LUPEMATASILA GALUMALEMANA TOLOGATA TOGIA TILE LEIA (Falelatai ma Samatau):** Faafetai i lau Afioga i le Fofoga Fetalai mo le avano o lenei foi itumalo o Falelatai ma Samatau. Ia, tatou te tiu i le latasi o lou vaa folau i le taimi ua sola i le viiga ma le faafetai i le Atua e pei ona avea ai lau Afioga i le Fofoga Fetalai ma o tatou ositaulaga i le taimi ua sola.

Ae faatalofa atu foi i lena itu o le malu i le afio o lau Afioga i le Palemia ma le Aiga Kapeneta, faapea foi Minisita Lagolago. Ia liliu mai foi i lenei itu o le Maota i sui usufono o lenei Vaega Faaupufai, le susu o le Susuga i le Taitai ma Susuga i alii ma tamaitai sui usufono.

E faatalofa atu foi i Ofisa Sili o Pulega o Matagaluega ma Faalapotopotoga a le Malo, aemaise o malo asi mai i le tatou fonotaga i lenei taeao. Susu foi lau Susuga i le Failautusi ma le Ofisa o le Fono faapea foi le tapuaiga a si o tatou atunuu.

E tulai atu i le ava ma le migao tele e tatau ai ona o le taua tele o lenei Lipoti i le vaavaai a lenei itumalo. E puupuu lava sina motugaafa foi ma se fautuaga e tuuian atu. E molimoli atu le agaga faafetai tele i le Afioga i le Taitaifono ma le Komiti e faapea foi le Afioga i le Minisita, aemaise lava

le Afioga i le Kovana ma le tatou Matagaluega o le Faletupe Tutotonu mo le faatinoina o galuega aua le tautuaina o si o tatou atunuu. Ua maua i le matou vaavaai ma faamaumauga fesoasoani a le tatou Malo sa faatinoina i le aufaipisinisi a o feagai ai si o tatou atunuu ma fita ma toatuga o le faamai o le Koviti-19. E pei o nisi o fesoasoani sa mafai ona tuusao atu i pisinisi, o le fesoasoani lea i le totogiina o pasene o latou aitalafu. O lea foi e le i umi atu talu ai nei, sa faatino ai foi e le tatou faigamalo se fesoasoani tuusao i le aufaipisinisi aemaise lava o faletalimalo mo le toe tapenaina ma le faaleleia o tatou faletalimalo aua le toe tatalaina o le affio mai foi o turisi ma tagata maimoa mai fafo.

Ua maua foi i le faafogafoga ma lefaalogologo i tala o le lalolagi le tulaga o lo o i ai le tamaoaiga o le lalolagi, aemaise lava mea nei o faletupe, commercial banks, e faitau fia piliona a latou polofiti o lo o maua. A o le fesili lea e tulai mai, o le a se galuega ma se fesoasoani a le faletupe tutotonu aua o latou lava lea e faatonutonuina le feafaatauaiga lea a commercial banks, i le faia o se fesoasoani e tuuina atu i le aufaipisinisi ma le mamalu o le atunuu i tului o latou nogatupe aua o lea e feagai le lalolagi aemaise o si o tatou atunuu ma fita ma faigata o le Koviti-19. A o lea lava e maua o lea e faitau fia miliona ma piliona tupe mama po o polofiti a commercial banks o lo o maua. A o le fesili; o le a se faamama-avega e tatau ona fai e commercial banks i le aufaipisini ma le mamalu o le atunuu i lenei vaitau? E le talafeauga ea le tau tuutuu i lalo o tului o nonogatupe o lo o feagai ai ma le aufaipisinisi ma le mamalu lautele o le atunuu? O lea foi e maua i Lipoti ua alu i luga le liquidity a commercial banks i totonu o le atunuu. Ua tau leai ni tagata e o e fai ni aitalafu, aisea? O ai se tagata o le a alu e fai se aitalafu po o se fai pisinisi o lea e faaletonu le tamaoaiga i le totogiina o le aitalafu. Ae pei o se tuualalo lea a lenei foi itumalo, i le taua o le tatou i ai i i, i le Matagaluega lea a le Malo, se i silasila ane le Malo po o le a se fesoasoani e tatau ona fai, i tului po o pasene o nonogatupe a le atunuu. Aua o lea foi e maua ua pau maualalo foi pasene o teugatupe a le atunuu. O lona uiga e tatau ona faapaleni ia vaega na. O le isi itu e fia avatu ai se tuualalo a lenei foi itumalo, o faletupe i fafo e pei ona i ai le faletupe o le atinae o Asia, o lo o mafai ona maua mai se faamama avega mo atunuu o lo o fai a latou nonogatupe i faletupe nei. E faamagalalo ai pe tuu avanoa i le taimi ma le piliota e togitogi atu ai aitalafu, aemaise lava mea o pasene po o tului. O lea foi la e mafai e le Malo ona faasafua atu le fesoasoani mai le faletupe o le Atinae, le faletupe o Asia, ina ia manuia ai e le gata i faalapotopotoga ae faapea foi le mamalu o le atunuu. O se vaai a lenei itumalo ma se tuualalo, ia se i vaavaai pe o le a se fesoasoani e mafai ona faatino e le tatou Malo ina ia mafai ai ona oo atu le fesoasoani lea i le lautele o lo tatou atunuu, aemaise le au faipisinisi aemaise o le tulaga o le turisi e pei ona toe agai i ai lo tatou Malo aua e tasi lea faamoemoega o le tatou atunuu mo tupe maua. E pei na o le pau ia o

nai vaega lau afioga i le Fofoga Fetalai, e tauala atu ai se tuualalo a lenei foi itumalo, i nai vaega e toe silasila totoa i ai le Faigamalo i lenei foi vaitau. O so matou tuualalo lea ma le faaaloalo, manuia tele le tatou Fonotaga.

**FOFOGA FETALAI:** Malo foi mo lou sao ma le tuualalo aua le tatou mataupu e pei ona i ai le Lipoti. O lou avanoa lenei i lau afioga i le Taitaifono e tali fuaitau i nisi foi o mataupu sa laga e le sui usufono o le Palemene.

**Afioga FALEOMAVAEGA TITIMAEA TAFUA (Taitaifono Komiti mo Tupe Maua ma Tupe Totogi):** Ia faafetai mo le avanoa i lau afioga i le Fofoga Fetalai, taeao manuia i le agafesootai ma le Matai Sili i lenei taeao e tusa o le fofogaina ma asaasa i le lagi e tusa o le talosaga molia i lenei taeao, malo faafetai tele.

E faatalofa atu i le paia ma le mamalu o le tatou Palemene, e faatalofa atu i le afio mai o lau Afioga i le Palemia i lenei taeao fou, ae a le mamalu i le tatou Kapeneta, le lasilasi o Minisita Lagolago, liliu mai foi i lea Itu i le afio atu o le afioga i le Taitai o le Itu Agai, le paia ma le mamalu o sui usufono uma o le Palemene. Ia liliu ane foi i le tapuaiga a Ofisa Sili o Pulega o lo tatou Malo, e faapea foi Faalapotopotoga Tumaoti. Ia malo lava le soifua ma le lagi e mama. E faapea foi ona faafeiloai atu i le faafeagaiga ma le faletua, ua faapea foi ona faaavanoa lenei taeao e taliu mai ai e faafogafoga, ua maua lenei avanoa e asiasi mai ai foi i le fonotaga a le atunuu, faafetai tatalo faafetai tapuai, o outou faiva lava o lo o manuia ai nei tapenaga o fuafua.

A o lei amatalia se tala, se i ou toe liliu ifo lava i le itu lea se'i...Lau afioga i le Fofoga Fetalai, se'i fai lava sina faamatalaga e faamaise ai i le Susuga i le Sea o Faanu Toomalatai, ua tuua le Malo o se tasi foi o auauna sa faapea ona galue ma tautua i si o tatou atunuu, i le tele o vaega eseese. E avatu ai le faamaisega i le faletua o Kasalautele ma le nofoaalo, e faapea foi le Matagaluega a Lilopulu, ia i ai pea le filemu, le agalelei ma le mafanafana o le Atua i la outou galuega. E faapena foi lau afioga i le Fofoga Fetalai, na oo atu se faamatalaga i le toesea foi o le Susuga i le toeaina ia Andy Leavasa Toefaeono, i le Vaioleola i Amerika e avatu ai foi le faamafanafanaga ia te oe le faletua, Losi ma le Matagaluega, ma le ekalesia o le Vaioleola. Ia i ai pea le filemu o le Atua e fesoasoani i galuega fai. O le susuga ia Andy e pei ona ou taua o se tasi o toa foi sa tautuaina si o tatou atunuu i le tatou Manusamoa i tausaga e tele. E tasi foi lea o uso na faapena ona filifilia i totonu o au fili a lo tatou atunuu, ae faatoa sefuluvalu ona tausaga. E momoli atu ai le faafetai tele mo le avanoa i laua afioga i le Fofoga Fetalai.

E le mafai ona tuueseā foi nai isi foi...le toeseā foi o le tina ia Silia Tafua Lemisio, i se taimi o lēna vaiaso ua tuānai. E le o tuua ia tama le aiga na lua, o lo o faapena ona i ai alo ma fanau e tautuaina le aiga ma le nuu ma le ekalesia ma le Malo. Faafetai mo le avanoa lau afioga i le Fofoga Fetalai.

Ona ou oo mai lea i le tulaga e pei ona saunoa ai... se i tuu atu nai tali e pei ona saunoa ai le susuga i le Taitai o le Itu Agai, ia momoli atu le faamalo ma le faafetai tele. E faafetai mo le tuualalo, faafetai mo fautuaga. E pei ona e taua tulaga ia o faletalimalo, e leai se vaega e le i oo i ai sailiiliga a le Komiti. O le tele o faletalimalo na faapena ona alu i ai faamanuiaga, na vaevae i ai le seleni e \$5 miliona, tofu uma faletalimalo ma seleni. E le gata i lea, o lo o faapena ona fesoasoani le malo, e pei foi ona outou silafila e le o se mea fou lea tulaga, o lo o tuuavanoa lava le tatou Malo i faletalimalo. E saunoa la lau afioga, o vaega uma ia o lo o faapena ona tilotilo i ai le tatou Malo i le agai i luma, o lo o faapena lava ona tilotilo mo se lelei aua le tau atinae tau turisi o si o tatou atunuu. Ae faafetai mo le tuualalo, e pei ona e fesiligia le pau... lau afioga i le Taitai o le Itu Agai, o lo o tumau lava le 9 masina o le foreign exchange i le taimi nei. O le tulaga e pei ona e taua i pasene ia na e taua, ia e le natia, o lēna e silafia uma e le mamalu o le atunuu, aemaise o le tatou Palemene ia le aafiaga o le lalolagi atoa, e le na o Samoa e aafia ai i le tulaga lea. O lo o aafia uma le lalolagi atoa i le aafiaga lea, e pei ona e taua ma e faapaseneina maia lau afioga, malo faafetai le lagalaga i mea lelei.

Ona liliu mai i le saunoaga a si ou uso lea mai Vaimauga, Sula, malo. Mo le silafia sa i ai muamua penefiti ia i le aufaigaluega lea a le Central Bank, peitai ane na toe aveese, lea e i ai le mafuaaga lea o le fautuaga lea, ona e i ai le manumanuga e pei ona e taua e ono afaina o tagata faigaluega ae o i faletupe foi ia... pei o le mafuaaga lēna na toe tuu ai le vaega lea o le fautuaga a le Malo, ae sa fai muamua ae na taofia masalo pe ua lua ni tausaga pe ua tolu talu ai. O le mafuaaga lēna mo le silafia lau afioga, na toe taumafai le fautuaga lea, ina ia toe tuu i ai faamanuiaga a le aufaigaluega. E pei ona e taua, o lo o faapena ona sologa lelei. O le toatele o le vaega lea e faigaluega i le faletupe tutotonu ua leva le latou tautua e le fou. O le isi foi manumanuga o le Kovana, ina ia faatumau le toatele o lana aufaigaluega. E le lelei le umi ona train ae te i ua toe o ese i se taimi. E pei o vaega na e pei ona e taua, ae momoli atu le faamalo ma le faafetai. O le isi vaega e pei ona e taua, o se taimi ona toe oo lea i ai, ona e le o i ai i totonu i le tala o le tupe epei ona e saunoa i auala a lou itumalo. Ia faafetai lagalaga i mea lelei, se o i ina e iloa ai le mataala o le faipule e tilotilo i mea e lelei mo le itumalo, ia malo faafetai.

E faafetai i lau afioga Lupematasila, faafetai i lau saunoaga. E leai, e leai lava se vaega e tasi o se e pei o lau tuualalo o lo o tuuina mai. O le fesoasoani a le Malo i le atunuu ma aafiaga o le Koviti-19, lea sa faaatoa atu i le lipoti faaletausaga o le 2021/2022, o lo o faaalua atu le stimulus

package mo pisinisi e tauala atu i le Faletupe o Atinae. Malo faafetai, faafetai i lau afioga mo fautuaga ma le taulagalaga i mea lelei. Mo lou silafia o lo o faapena ona...e le o tilotilo lava le Komiti i se vaega o lo o faapena ona taumafai lava ia sologa lelei ma sologa manuia, ma ia faapena ona oo atu uma i le lautele o le tatou atunuu ia faamanuiaga.

O lo o i ai foi faiga faavae a le Faletupe Tutotonu e faatonutonu ai Commercial Banks i mea tau interest e pei ona e taua, ma tului a o feagai le atunuu ma le Koviti-19. O lo o faapena lava ona fetuutuunai. E momoli atu ai le faamalo, faafetai le taulagalaga mo mea lelei. Ae mo lou silafia o lo o faapena lava ona taumafai ia le tatou Faigamalo i se lelei aua le lautele o le tatou atunuu. E pei o le mea lea, ae a i ai nisi mea e le o taua, se i tuu atu e tali e le Minisita. Ae o lea ou te iloa ua maea uma vaega na fesiligia e a outou afioga. Ia ma le agaga faaaloalo faafetai.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai pe maua se avanoa.

**FOFOGA FETALAI:** O se isi mea fou pe o se isi mea ua uma ona taua?

**Tofa Hon Lauofo Fonotoe Nuafesili Pierre Lauofo:** E leai e pei o le mataupu lea sa ou laga lea na saunoa tali faamalamalama mai ai le Taitaifono. I le tulaga lea o fesoasoani i faletalimalo, lea sa i ai le \$5 miliona lea na pasia i le Tala Faatatau Autu o le Tupe i le tausaga na tea nei. O le mea lea e avatu ai le tuualalo, ona o lea e faaaua atu i le Faletupe o Atinae, ae o le mea lea e tupu, o lo o faamatuu i tua i lalo o tulaga masani o nonogatupe. O lona uiga e talosaga le faletupe ma ia faamalieina ia aiaiga o nonogatupe. O le mea la lea e tupu, e pei ona silafia e lua tausaga e leai ni turisi e omai, leai se tupe a faletalimalo, e le gafatia, a talosaga atu e le agavaa mo lea fesoasoani.

Ae pei o le tuualalo ia, sei toe silasila ane lena foi itu i le tatou Malo, i nisi aualea e mafai ai ona fesoasoani mo nai faletalimalo. ona o lea e tu le loma, o lea tatou te talimalo i fonotaga tetele ia e fai mai i Samoa. E tele le manaomia tele ma taua e tatou faletalimalo, ia faaauau le tulaga lena. E pei o le aualea lea o le tuualalo. Ia faafetai mo le avanoa.

**FOFOGA FETALAI:** O lea ua maua atu le tuualalo. Ia se i tulai mai le Taitaifono.

**Afioga FALEOMAVAEGA TITIMAEA TAFUA:** Faafetai tele lava i lau afioga i le Taitai o le Itu Agai. E mo le silafia e lau afioga, o le \$5 miliona muamua lea na i ai, sa tufa sao lava i faletalimalo, e le i aualea faapea e faasoasoa. E vagana le \$5 miliona lea ua ave i le faletupe, e faasoasoa i nonogatupe e fesoasoani. Ae o le \$5 miliona muamua, na

faapena ona tufa uma, e leai se...sa tufa sao lava i faletalimalo, sa tufa sao lava le seleni na vaevae atu e le Malo. E na ona faamanino atu i lau afioga, o le \$5 miliona muamua, na tufa sao lava i lima o e o lo o faia faletalimalo. Ma le agaga faaaloalo.

**FOFOGA FETALAI:** Faafetai, o lea ua manino lea vaega. Malo faafetai i lau Afioga i le Taitaifono le mataalia, o lea ua manino lelei e eseese 5 miliona. O lea ua manino.

Tulai mai, o oe foi o le isi sui o le Komiti.

**Afioga ALIIMALEMANU MOTI MOMOEMASU ALOFA TUUAU (Sui Usufono Tamaitai - Alataua Sisifo):** Ia faafetai mo le avanoa. E faatalofa atu i lau afioga i le Fofoga Fetalai, faapena le lena itu o le Maota i lau afioga i le Tamaitai Palemia, le afioga i Minisita ma Sui Minisita, faapea foi lena itu o le Maota. Ua ou tulai e fesoasoani atu i le matou lipoti, leaga o matou e fai faatasi le matou galuega. O le ua uma ona saunoa le matou Taitaifono, o lea ua tele ina tali atu ai isi fesili, ae o fesili ia na misi, o lea ua uma ona saunoa atu le Taitaifono i le tulaga lea.

Lau Afioga i le Taitai o le Itu Agai, i fesoasoani ia i faletalimalo. O le \$5 miliona o lo o i ai nei, o lo o i ai faiga faavae na aumai ai, e tai 200,000, ae o lea ou te vaai atu o lea e i ai le Faletupe o Atinae, i tatou lipoti lea o le a oo atu i ai, atonu o i ina o le a auiliili ai lea tulaga i le faagasologa. O le fesili a le sui usufono mamalu mo Falelatai, pe le i i ai ni fesoasoani a le Faletupe Tutotonu ia tatou aitalafu? O lea sa i ai, i le tausaga faaletupe lea tatou te talanoa ai, o le 2019/2020 ma le 2020/2021. O lea sa i ai a tatou faamama-avega ia sa ave uma i nonogatupe, lea sa faapau ai i lalo pasene o nonogatupe ia sa ave, e le gata i pisinisi a o tagata taitasi, lea sa faau i totonu o Commercial banks, lea sa faasau i totonu o le tatou stimulus package mo le silafia. O lea na e taua le alu i luga o le liquidity i lena vaiata, o lea ua tatou iloa uma le tulaga o lo o i ai, ia e fua lava i e e fia nono a latou nonogatupe faapea foi i galuega tetele e faatino e le Malo, ona alu ifo foi lea i lalo o le tatou liquidity pe a tele tupe e alu i tua. Ae o le fesili mulimuli a le sui usufono mai Vaimauga pe o i ai ni avanoa e le o faatumuina a le Faletupe Tutotonu. Mo le silafia e le Maota, o le Faletupe Tutotonu e le aumaia i totonu o le Maota lena tala faaletupe, e fai lava e latou e le aumaia i totonu o le tala o le tupe a le Malo. E pule foi lava latou i le faagasologa, o lo o i ai le latou Board, o a lava tupe e totoe, e toe tuu lava i totonu aua le faagaoioiga o le latou auaunaga. Ma le faaaloalo, o le fesoasoani atu lena a le Komiti tupe e tali atu ai nisi o fesili ma le faaaloalo.

**FOFOGA FETALAI:** Malo faafetai, faafetai i lau afioga i le Sui Taitaifono a le Komiti o Tupe o lea ua maua lau fesoasoani, ua fesoasoani

aua le saunoaga malamalama a le Taitaifono, aua nisi o mataupu taua na laga e sui mamalu. Malo faafetai. E tapa lau afioga i le Sui Minisita, i sau faamalamalamaga i nisi o mataupu o lo o totoe.

**Afioga Hon LEOTA LAKI LAMOSITELE:** Faafetai mo lou avanoa lau afioga i le Fofoga Fetalai, e faatalofa atu foi i le paia o le Maota i lenei taeao. Ae ua ou tulai atu ma le faaaloalo e fono faapipii atu se faamatalaga i mataupu e pei ona tatou talanoaina nei. Ou te talitonu lava o lea ua tele ina malamalama foi ia le mamalu o sui e tusa ai ma le lipoti a le Komiti. Ae na o ni nai mataupu laiti ia e fesoasoani atu ai i lona aotelega i le tulaga o lo o taatia ai le lipoti e pei ona talanoaina. O lea e matau atu lava ma le totoa i le fautuaga e tusa ma le toe taumafaiga e toe uunaia ma faaleleia atili fesoasoani i le vaega lea o tagata tafafao mai fafo, tourism industry ona o lona taua e pei ona silafia.

E le gata foi i lea o le vaega lea o le tupe lafo mai fafo, tasi lea vaega o lea e taumafai atu i ai le tatou Malo e faapaleni ai ia le faagasologa o le tala o le tupe. E pei ona maua atu le aofai o tupe sa masani ona maua mai i tausaga i tupe lafo mai fafo. Ou te talitonu e tele lava le suiga lea o le a i ai, e le i maua mai tatou faamaumauga o Tesema, o lea ua i ai nei, ae ou te talitonu e feololo le tele o le tupe pe a ma le \$800 miliona se aofai o se tupe e ono maua mai i tupe lafo i le tausaga lea na tea nei i le faaiuga o Tesema. Ae se i maua mai le faamatalaga ona mafai lea ona faasao atoatoa. E oo foi i le tulaga lea i aitalafu, e pei ona silafia, o lea sa taumafai e tuliloaina le limasefulu pasene o le fua o le aitalafu agai i le fua o le tamaoaiga. O le taimi nei la, o lea lava e i lalo ifo o le 50% le taofiofiga o aitalafu lea. Ou te talitonu foi ua i lalo ifo o le piliona tala le aitalafu lea, ma o se tulaga lelei lea, pe a faapea e faatusatusa i le tele o luitau o lo o feagai ma tatou, ae o lea o lo o mafai lava ona totogi le tatou aitalafu. O le isi mafuaaga lea e ala ai ona alu i lalo le fua lea, ona o lea ua amata ona toe ae i luga le tatou fua o le tamaoaiga. E moni o lea e faapea mai o lea e toese le faagasologa o le tamaoaiga, a o fuainumera ia e aumai, o fuainumera o lo o tau mai ai i, o la e ae i luga le fua o le tamaoaiga, o lona uiga o lea e gaioi le tatou atunuu i ona atinae, o le mafuaaga lena e ala ai ona faapea.

O lea foi o lo o aumai le fautuaga agai i le siiga o le tau o le soifuaga, e sao lelei, atonu e le tau faamatala atua le mea o lea e ala ai ona sii le tau o le soifuaga. Ae o isi vaega ia e tilotilo totoa i ai le Malo ia mafai ai ona fesoasoani i le mataupu lea, o le toe faamalosi lea o le tau o oloa i le mea e tatau ona i ai. Aua e ui lava ina pau tiute, o lea sa faapau atu tiute a le Malo ina ia taugofie ai le tau o oloa. Ae ona o le taimi nei o la lava e tatala le avanoa i mea ia o tauvaga, a faapea o la e pau i lalo le tiute o mea ia e faatau mai, e tatau la ona pau i lalo le tau o oloa. Ae afai la e le o pau le tau o oloa, o lona uiga la, o la la e alu i luga le pasene sii a le faatau oloa, ae o

le mea lena e faataua ai tele le i ai o le fua pau le price control lea, ina ia taumafai e fesoasoani i le mataupu lea. A o isi vaega taua lea ua amata ona gaoioi atu i ai le tatou Malo i lalo o le polokalame lea o le atinaega o itumalo, o le taumafaiga lea o tatou oloa e faatau i fafo, e auala i tatou faatoaga ia ua amata ona atinae mai. Ma le tulaga la lea, o le taumafai e faaoga ia mea o lo o tatou totona i totonu o le tatou atunuu, import substitution, ina ia aua ai nei o tatou o soo i le faleoloa. Aua o le mea moni lava e ala ona e tigaina o lou alu fua i le faleoloa. Ae a faapea o la lava e maua i ou tuafale ia mea uma ia e te manaomia, e tau leai se mea e te popole ai i nisi mea e te manao ai, pe a faapea o la lava e mafai ona e ola i totonu o le lotoifale. O le toatele o tatou ia o lo o aumau i nuu i tua, o le olaga lea o lea tatou te i ai.

O nisi la na mea o lea e fia taua atu, ina ia mafai ai foi ona malamalama le tatou Maota i le faatulaga o lo o maua mai i le lipoti lea a le Faletupe Tutotonu. O le isi mataupu lea sa maua atu e uiga i faamanuiaga mo le aufaigaluega, e tau tilotilo atu i le isi itu i le vaega lea, ona o le vaega lea o le banking industry lea, ua amata foi ona alualu i luga totogi ma faamanuiaga a le industry e le gata i totonu o le Malo a o tua atu o le Malo. O lo o i ai faletupe o la e faagasolo a latou, o la foi latou te manaomia tagata faigaluega lelei atu ina ia mafai ai ona, o le mea lea o lea e alu ai i luga a latou tupe faasili, masalo ai o le lelei o le aufaigaluega la e aumai. O le mea la e tupu, e ono gaoioi ese ai tagata faigaluega ia ua ofa mai o latou totogi e o atu ai, o le mea la lena e taua ai i le lipoti, e faapea, ia toe silasila i faamanuiaga a le aufaigaluega la e i ai, ina ia mafai ai ona nofo mau ai pea i le vaega lea.

O lea ua faamauiina e le Faletupe Tutotonu le fautuaga e pei ona aumai, ma o le a faapea foi ona tilotilo i ai. I le mataupu lea o le interest rate o le tului, ou te le o mautinoa lelei i ai, ae pei o le tatou tului lea e i ai, o lea e tatala le avanoa e faatauva ai ia le vaega lea. E le o faatulafonoina e le Malo, a faapea ua alu tele i luga le tau o le soifuaga pe ua alu tele i luga ia tului, ona taofi atu loa lea faapea o lea o le a faatulafono atu loa. O le mafuaaga e le faia ai le mea lea, ina ia maua ai pea le agaga faatauva lea ina ia mafai ai ona lelei atoatoa le auaunaga. E pei ona outou faafofoga i nisi o sui ua faapea mai, o lea ua tele tele tupe ia ua i totonu o tatou faletupe, le liquidity lea ua ae i luga i le taimi lenei, ona ua le omai tagata i le faletupe. O lona uiga la, a faapea e fua i le tulaga faatauva lea, ua tatau ona pau i lalo le tului, e pei o le concept lena o lea e ala ai ona faapea. Ae le fai a'i, o lea ua maua atu le finagalo, ona o lea o le a silasila pea i ai le faletupe, po o le a se fuafuaga e tatau ona fai agai i ai. Ua tatau ona pau i lalo le... i le tulaga lena o le tului o lea o lo o taatia ai i le taatiaga lena e pei ona i ai.

O le isi mataupu lea o lo o taua mai i le tulaga lea o le totogiina o aitalafu, aua o le mea masani lava le mea lea a le Malo o le nono mai faletupe tetele

ia e pei o le Faletupe o Atinae, e i ai soften loan e laititi lava tului e aumai, ona toe loan lea, ona toe nono atu lea e le Malo i ona vaega eseese. O le faataitaiga o le Faletupe o Atinae e masani ona latou faia ia le matafaioi lea, ina ia mafai ai ona laiti tului. A faapea e nono atu tupe, a o la e gafatia e tagata tuutuuga e toe totogi ai. O lea o lo o i ai le fautuaga o lo o aumai ina ia toe silasila ifo i ai i le mea lea. O le naunautaiga lava o le Malo, ina ia taumafai e ausia le vaega lea, ia pau le tului, ma toe fetuunai taimi e totogi mai ai aitalafu, ina ia mafai ai e tagata ia ona gafatia le totogiina o aitalafu ia, ma faatupu olaola ai a latou atinae. Ae o le popolega lava, o le luitau o le vaega lea, o le le totogiina mai o latou aitalafu. Aua o le taimi foi o le lelei, e fiu foi le faletupe e tau tulituli ia tagata ae i ai foi lava alofaga e masani ona i ai. o auala na, o lea e taumafai ai foi faletupe, e pei o le Faletupe o Atinae e fai ma faataitaiga, ina ia taumafai ai e fetuutuunai lelei ia tuutuuga o aitalafu ia, ina ia aua ai nei gau. Aua o lea tou te silafia lelei o la e tau faaletonu le faletupe, ae mafua mai ona o lana taumafaiga ina ia fesoasoani i le mamalu o le atunuu o lo o fia maua se fesoasoani ia latou atinae.

E talitonu o vaega ia sa ou fia faaopoopo atu i ai, e lagolago i le mataupu e pei ona talanoaina.

**FOFOGA FETALAI:** Faafetai malo saunoa i lau afioga i le Sui Minisita o Tupe i lenei vaitaimi. Ia tulai mai lau afioga i le Taitaifono mo le lafo.

**Afioga FALEOMAVAEGA TITIMAEA TAFUA:** Lau afioga i le Fofoga Fetalai, ou te faatu le lafo, *Ina ia faamaonia e le Fono Aoao le P.P.2022/2023 Nu. 11, Lipoti a le Komiti o Tupe Maua ma Tupe Totogi i le P.P 2020/2021 Nu. 106 ma le P.P. 2021/2022 Nu. 24 Lipoti Faaletausaga a le Faletupe Tutotonu o Samoa mo le tausaga faaletupe 2019/2020 ma le 2020/2021.*

Ma le faaaloalo.

*Faaluaina e le sui usufono mo Lefaga ma Faleaseela ma le sui usufono mo Gagaemauga 2 ma le sui usufono mo Aana Alofi 3.*

*Na faamaonia le lafo.*

**FOFOGA FETALAI:** Ou te tapa lau afioga i le Minisita mo le Lafo i Tali a le Malo.

**Afioga Hon LEOTA LAKI LAMOSITELE:** Lau Afioga i le Fofoga Fetalai ou te faatu le lafo, *Ina ia faamaonia e le Fono Aoao le Tali a le*

*Malo i Fautuaga a le Komiti o Tupe Maua ma Tupe Totogi pei ona ou tolaulauina atu.*

*Faaluaina e le Minisita mo le Soifua Maloloina, Minisita mo Leoleo, Falepuipui ma le Tinei Mu ma le Minisita mo Faamasinoga ma Pulega Tau Faamasinoga.*

*Na faamaonia le Tali a le Malo.*

**P.P.2022/2023 NU. 12 LIPOTI A LE KOMITI O TUPE MAUA MA TUPE TOTOGI I LE P.P.2020/2021 NU. 17, LIPOTI FAALETAUSAGA A LE FAAPUTUGATUPE MO LE LUMANAI MANUIA O TAGATA SAMOA MO LE TAUSAGA FAALETUPE 2020/2021**

**P.P.2022/2023 NU. 75 TALII A LE MALO I LE P.P.2022/2023 NU. 12, LIPOTI A LE KOMITI O TUPE MAUA MA TUPE TOTOGI I LE P.P.2020/2021 NU. 17 LIPOTI FAALETAUSAGA A LE FAAPUTUGATUPE MO LE LUMANAI MANUIA O TAGATA SAMOA MO LE TAUSAGA FAALETUPE 2019/2020.**

**FOFOGA FETALAI:** Tulai mai lau Afioga i le Taitaifono o le Komiti o Tupe Maua ma Tupe Totogi.

**Afioga FALEOMAVAEGA TITIMAEA TAFUA:** Ou te faatu le lafo, Ina ia faautagia e le Fono Aoa le Lipoti a le Komiti o Tupe Maua ma Tupe Totogi o loo tuuina atu ai Sailiiliga, Fautuaga ma Iugafono. Ma le faaaloalo.

*Faaluain e le sui usufono o Lefaga ma Faleseela ma le sui o Safata Nu 02*

*Na faamaonia le lafo.*

**FOFOGA FETALAI:** Ou te tapa lau Afioga i le Taitaifono mo le tolaulauina o Sailiiliga, Fautuaga ma Iugafono a le Komiti.

**Afioga FALEOMAVAEGA TITIMAEA TAFUA:** Faafetai mo le avanoa faafetai lau Afioga ile Fofoga Fetalai, faatalofa atu foi i lenei itula faaauauina o matou Lipoti. Lau Afioga i le Fofoga Fetalai o le aotelega lenei o sailiiliga a le Komiti lau Afioga ile Fofoga Fetalai ua i luma nei o le Maota le Lipoti a lenei Komiti e tau lava ina ou pai ile aotelega o sailiiliga a le Komiti i lenei Galuega ma soo se ootootoga puupuu lenei o sailiiliga a le Komiti i le Lipoti Faaletausaga a Faaputuga Tupe mo le Lumanai Manuia o Tagata Samoa NPF 2020/2021 na faamauiina e le

Komiti o Tupe Maua a le Faalapotopotoga e tusa ma le 97.9 miliona o Tupe Faaalu a le Faalapotopotoga e 12.2 miliona na faamauina i Tupe Faasili a le NPF i le 2020/2021 e 91.7 miliona mai Tupe na faafaigaluegaina ma tupe mai saofaga, galuega ma matatia ausia i le 2020/2021. Na faamauina e le Komiti le 8% o le tului faamealofa na faalauiloa e le faalapotopotoga mo le au fisaofaga i le 2020/2021 e tusa lea ma le 61.7 miliona lona aofai. Na faailoa e le pulega e 30 miliona le vaega tupe na totogi sao atu i sui fisaofaga o cash out na maua e le Komiti le faaitiitia o aofaiga o sui fisaofaga faigaluega le active members mai le 33,182 i le 2019/2022 ile 32,337 i le 2020/2021, peitai na taua e le faalapotopotoga o lea faaitiitia faaitiitiga na mafua ona o le vaitaimi lea sa pepesi ai le faamai o le misela seia oo ina tapunia ia femalagaina faavaomalo i Samoa nei o le aafiaga o le Koviti 19. O nei faafitauli na ala ai ona aafia pisinisi tumaoti aemaise lava faletalimalo na mafua ai ona faaitiitia sui fisaofaga ona e leai ni galuega pe ua vaea foi mai a latou galuega talitonu le faalapotopotoga e ui ina faamauina lenei faaitiitiga ae o loo matauina pea le toe foi o le tamaoiga o le atunuu i se tulaga lelei ma mautu ma e le tatau ai ona toe faateleina se faaitiitiga o sui fisaofaga i le lumanai.

### **Fautuaga 1**

Na faautuaina e le Komiti le Faalapotopotoga ina ia silasila i se auala e faamalositia ai le aoina o aitalafu tuua poo arrears o loo faamauina i le Lipoti Faaletausaga 2020/2021.

### **Fautuaga 2**

E fautuaina e le Komiti le Faalapotopotoga ina ia ave se faamamafa i kamupani ma pisinisi o loo faafaigaluegaina tagata ina ia vave totogi saofaga ua uma ona aveesea i totogi o latou aufaigaluega ma toe silasila i aafiaga o le tulafono faatonutonu o loo faatinoina ai le aoina o saofaga a tagata faigaluega.

### **Fautuaga 3**

E fautuaina e le Komiti le Faalapotopotoga ina ia silasila e faaafia sui usufono o le Palemene e ala i faamanuiaga dividends o loo totogi atu e le fisaofaga i lalo o le penisione a le Palemene.

### **Fautuaga 4**

E fautuaina le Komiti le Faalapotopotoga ina ia siitia i le 15% saofaga a sui usufono uma a le Palemene iugafono lau Afioga i le Fofoga Fetala'i i le maea ai o le iloiloga a lenei Komiti e fautuaina ai le Fono Aoa'o Faitulafono, ina ia faamaonia le P.P 2021/2022 Nu17 Lipoti Faaletausaga a le Faaputuga Tupe mo le Lumanai Manuia o Tagata

Samoa mo le Tausaga faaletupe na faaiuina i le aso 30 Iuni 2021 ma le agaga faaaloalo.

**FOFOGA FETALAI:** Faafetai lau Afioga i le Taitaifono, lau Afioga i le Minsita , tapa lau Afioga i le Minisita mo le Tali a le Malo, lau Afioga i le Sui Minisita.

**Afioga Hon LEOTA LAKI LAMOSITELE:** Faafetai lau Afioga i le Fofoga o le Fono tusa ai ma le avanoa, fia tuuina atu ia tali e pei ona talosagaina e le tatou Komiti, o fautuaga a le Komiti e pei ona tolaulauina mai. Fautuaina e le Komiti le Faalapotopotoga ina ia silasila i se auala e faamalosia ai le aoina o aitalafu tuua o loo faamauina e le Lipoti Faaletausaga 2020/2021 o le tali ua faamauina.

### **Fautuaga 1**

Na fautuaina e le Komiti le Faalapotopotoga ina ia silasila i se auala e faamalosia ai le aoina o aitalafu tuua (arrears) o lo o faamauina i le lipoti faaletausaga 2020/2021.

### **TALI**

Ua faamauina le fautuaga. O loo faaaauu pea ona faaitiitia le aofaiga o nonogatupe ua le o toe iai ni aseta e noatia ai, o le non performing loans i lalo ifo o le 1%.

### **Fautuaga 2**

E fautuaina e le Komiti le Faalapotopotoga ina ia ave se faamamafa i Kamupani ma Pisinisi o loo faafaigaluegaina tagata ina ia vave totogi latou saofaga ua uma ona aveese mai totogi o le aufaigaluega, ma toe silasila i aafiaga o tulafono faatonutonu o loo faatinoina ai le aoina o saofaga a tagata faigaluega.

### **TALI**

Ua faamauina le fautuaga. O lo o tagatagai pea le ofisa o auala e faamalieina ai Kamupani ma Pisinisi faapea le aufaigaluega, tuu avanoa foi le ofisa i Pisinisi ma Falefaigaluega ile totogiina o saofaga a le aufaigaluega e ui o loo feagai pea ma le tele o luitau ona o le tulaga o le tamaoaiga.

### **Fautuaga 3.**

Fautuaina e le Komiti le Faalapotopotoga ina ia silasila ia aofia ai sui usufono o le Palemene e ala i faamanuiaga poo tufatufaga o loo totogi atu i le aufaisaofaga i lalo o le penisione a le Palemene.

### **TALI**

O le tali o totonu tu sao faamanuiaga a sui usufono i latou saofaga i tausaga taitasi e tusa ai ma Tulafono o le Penisione a le Palemene.

### **Fautuaga 4**

Fautuaina le Komiti Faalapotopotoga le Komiti ina ia siitia le 15% saofaga a sui usufono uma o le Palemene.

### **TALI**

Faamauina le fautuaga o lea tuuina atu lenei talosaga i le Komiti Faatonu mo le talanoaina i le isi fonotaga ma le faaaloalo faafetai.

**FOFOGA FETALAI:** Faafetai lau Afioga ile Minisita mo le tolaulauina o Tali manino a le tatou Malo e tusa ai ma le lipoti a le Komiti.

Talu ai ona lea ua tatou oo mai taimi malolo o le taeao o lea toe tuu atu le avanoa i le mamalu o le Palemene pe a tatou foi mai le malologa.

*Na faataatiaese Taulumaga a le Fono Aoaio Faitulafono mo lana malologa masani i le itula e 10:44 i le taeao ma toe faaauau i le itula e 11:25 i le taeao.*

**FOFOGA FETALAI:** Ou te faasilasila atu ua toe amatalia nei taulumaga o le Fono Aoaio Faitulafono.

I le toe talii mai ai o le tatou Maota, e i ai le manatu ua saoi alo le taligasua o le Paia o le Palemene, maua foi se faasiliga malosi e faaauau ai le tatou galuega. Faafetai ile Atua i lana foai faapea foi le tatou Ofisa ma gaselega aua le tautuaina o le tatou Maota. E faataatiaese tatou taulumaga mo le malologa ua maea ona folasia le Lipoti a le Komiti faapea foi Tali a le Malo, ma o le avanoa lenei mo se sui mamalu e fia saunoa i le Lipoti a le Komiti faapea foi Tali a le Malo, ia tulai mai lau Afioga ile Taitai o le Itu Agai .

**Tofa Hon LAUOFO FONOTOE NUA FESILI PIERRE LAUOFO:**

Faafetai mo lou avanoa lau Afioga i le Fofoga Fetalai, faamauina foi le faafetai i le Pulega ma le Komiti Faatonu o le tatou NPF mo Lipoti Faaletausaga ua folasia nei i le Maota. Faafetai foi i le Komiti ma le latou galuega e tusa ai male Lipoti faapea foi Tali a le tatou Malo. O nai vaega ia e fiaoo i ai se talanoa lau Afioga i le Fofoga Fetalai, o le talosaga atu i lau Afioga i le Taitaifono poo le Afioga foi i le Minisita se i faamanino mai lava i se taimi le uiga o le tali lea Nu.3 fautuaga a le Komiti. Ona e pei e le

o manino i lau vaai, le pasene foi lea maua e le aufaisaofaga lea pei e le o manino poo maua, pei a e le o maua pe agavaa iai ia Afioga i sui usufono i le pasene lea, na o le tagata faisaofoaga faigaluega o loo i tua ma le Malo. Ae se taimi sei toe faamalamalama atili mai le tulaga sao lea ona pei o lea foliga mai i le tali o lea agavaa iai sui usufono ae pei a e le o agavaa i ai sui usufono i le pasene masani foi lea. O le fautuaga 4 pei ona faataatia mai i le Lipoti a le Komiti o lea e fautuaina ai le siitia i le 15% pasene saofaga a sui usufono uma o le Palemene 15% totogi a le Malo faapea foi nisi vaega lea totogi mai e le sui usufono mai ia latou totogi. Ae tau lava ona faapea atu o lea ou te vaai i le Lipoti Faaletausaga a tagata Matutua le au penisione a le NPF faapea foi le Lipoti a le Komiti o Tulafono Tumau o le Maota o loo latou iloiloina le Lipoti lea a tagata matutua poo tagata penisione a le tatou atunuu, o loo fautuaina e se Konesale sa malaga mai fafo le 17.3% lea fautuaina e le Konesale se i silasila ane lau Afioga i le Minisita ma le Komiti, ona o lea e fautua mai le Komiti Faapalemene e 15% lea matau atu i le Lipoti a le Konesale lea sa aumai o loo fautuaina le 17.3% mo sui usufono, se i silasila ane lau Afioga i le vaega lena. O lo o matauina i Lipoti Faaletausaga i le 2020/2021 le siisii pea i luga tupe faasili a le tatou NPF.

E momoli atu ai le faamalo ma le faafetai i le Pulega ma le Komiti Faatonu faapea foi le Minisita, i galuega lelei o loo faatino o lea o loo siisii pea i luga le tulaga lelei o tatou tupe faasili e pei ona maua le 2020, e 59 miliona le tupe sa maua a le tatou NPF, tupe faasili ia siitia foi lea i le 2021 i le 85 miliona. Momoli ai le faamalo faafetai o lea la e matau o loo alualu pea i luga mai lena vaitau o lea foi manatua i le vaitau lea sosoo mai lea luma mai lea sa aafia tatou i le faamai atonu la sa pau laititi i lalo tulaga ia ae sei oo mai lipoti ona tatou vaavaai lea iai poo le a se tulaga sa iai. Ae i ai le talitonuga o le taimi lenei o lea ua tatou toe foi i le mea masani sa iai o lea ua toe siitia i luga ia le tulaga lelei ma le tatou tupe maua o le NPF.

O le 2020 lea na maua i le Lipoti a le Komiti e 8% le 2020 e 9.1% lea sa maua a le aufaisaofaga. I le 2021 e 8%. Afai la o lea e siisii pea i luga le alu o le lelei e oo mai i le taimi lenei, e iai le fautuaga manaiia pe a tuu atu loa i le 10% o le tatou tupe foi lea mo le aufaisaofaga aua o i latou ia e tatau ona agai tonu i ai le faamanuiaga, aua o latou tupe ia o loo vavae mai o latou totogi ma tuu i totonu o le tatou NPF o loo faatupulaia ai pea ia tulaga o seleni maua o lea foi e maua i le lipoti i tausaga nei e 2 ia tupe o loo invest ia investment ia poo o loo faagalua foi lea i fafo.

O lo o i ai leo lea e matauina o lo o iai le vaega tupe a le tatou NPF o loo invest i Ausetalia faapea Fiti o lea matauina i se tulaga lelei sa tulai mai Fiti maua mai ai se tatou dividend a le tatou NPF silia ma le 400,000 i le vaitau lea, tau vaavaai atu ai o tulaga lelei ia a o invest aua lea e ave i fafo, ia o loo invest i fafo le tatou tupe ia. O lo o mautinoa ai tupe maua ma tupe faasili e maua mai ai tatou dividend, fesoasoani mo le aufaisaofaga faapea

foi ia polokalame o loo faagaioi e le tatou NPF o le tulaga i le tatou faamanuiaga ia, o lea lava e tumau le 5,000 mo fesoasoani lea mo se faisaofaga ua maliu. Pei ou te matau atu fai si leva o lea 5,000 tele lava le suiga ua iai le tulaga i lenei foi vaitau. E i ai le fautuaga ua tataua ona sii i luga le 5,000 lea ua le toe taugofie foi le tau o le soifuaga i lenei vaitau. O lo o siisii foi i luga isi vaega ae tasi lea vaega e tataua ona silasila i ai le tatou NPF, i se tulaga faapena.

O fesili a lau Afioga i le tulaga lea i le investment a le tatou NPF lea e aumai i i i le Mulifanua Beach Resorts Samoa Limited, masalo o le faletalimalo foi lea i Mulifanua o lea ou te vaai atu e foliga mai o loo iai se tupe masalo pe faaupu o se tupe pau 10 miliona. O le a se tala lata mai i le tatou investment lea? Pei o le fesili lena i se tulaga lata mai ae po o se a se fuafuaga a le tatou NPF i lea foi atinae aua e pei ona silafia o tupe uma ia a le aufaisaofaga ia o loo togi totonu o le tatou NPF. E mafua ai ona faatino ia investments faapea, pei o nai fesili ia ma se manatu puupuu lena lau Afioga i le Fofoga Fetalai, faafetai mo lo'u avanoa.

**FOFOGA FETALAI:** Ia malo faafetai, malo foi mo le..., nai fesili foi ma nai faatupu manatu ile Taitaifono aemaise foi le Afioga ile Minisita. Ia o le avanoa lenei i se tasi o sui, tulai mai lau Afioga i le sui Fofoga Fetalai.

**Afioga AUUAPAAU MULIPOLA ALOITAFUA MULIPOLA (Aiga i le Tai):** Faamalo faafetai, viia le Alii o lea foi ua pale auau le taliga o le sua a le mamalu o le Palemene maua foi se faasiliga malosi, afioga i le Taitai o le Malo ma lau Kapeneta, aemaise foi le Afioga i le Taitai o le Itu Agai ma le la itu o le Maota. Faafetai i lau Afioga i le Taitaifono mo le lipoti malamalama, o le isi vaega o lou tulai o lea sa saunoa i ai le Afioga i le Taitai o le Itu Agai. Ae o lou tulaga faa-Taitaifono i le matou foi Komiti, ou te manatu e fia fai se manatu i le fautuaga 3 ma le 4, e ui o lea ua fautua foi i ai le Afioga o le Taitai o le Itu Agai. Ae ona o le Lipoti lenei o loo i luma o lau Komiti le lipotiina mai o le Matagaluega lea a le NPF le ofisa o le NPF e patino lava i faamanuiaga tau Palemene, ae matau atu o lea ua aumai ai le fautuaga faale-Komiti o Komiti o Tupe Maua. A fua foi i le fautuaga lona 4 pei ona saunoa le Taitai o le Itu Agai, a o se sui usufono foi o lau komiti lea ua talanoaina pasene ae o le vaega tonu lea ma le vaega lea ma le itutino lea o le Malo lea e lipoti mai i i i le Komiti lea ou te Taitaifono ai, fautuaga la nei tei ua fai vaeane le galuega a le uto o le gataifale ae taoto mai ai matou o loo tele ma manaia la matou faaiuga faafautuaga e aumai ma manaia foi la matou pasene tatou te fiasia uma iai. O le fautuaga lea lau Afioga i le Fofoga Fetalai ae taatia mai la matou matafai oi o lea la fou mai se taimi le faalauiloa mai o le lipoti a lenei Komiti ma le agaga faafetai.

**FOFOGA FETALAI:** Ia malo faafetai atonu ua taua foi le faamanatu mai le afioga i le Taitaifono, lea foi tua o le tatou galuega faa-Komiti ae atonu o la foi ua faafogafoga mai le Taitaifono ma le Afioga i le Minisita, atonu o le a fetuutuunai faapena, tulai mai lau Afioga le sui mamalu Aleipata Itupa i Luga.

**Afioga FUAAVA SULUIMALO AMATAGA (Aleipata Itupa i Luga):** E faafetai atu i lau Afioga ile Fofoga Fetalai mo le avanoa o le sui o lenei Itumalo. E toe faateleina le agaga faafetai e pei ona avea ai foi ia Afioga i le Fofoga Fetalai, ma ositaulaga e faafetaia le agalelei o le tatou Tapaau i le Lagi, ua faapea ona taitai filemu mai le soifua o le Maota nei. E faafeiloai atu ai foi i le paia o le tatou maota fono. I le afio o le Afioga i le Tamaitai Palemia ma le vasega o Kapeneta, i Alii ma Tamaitai aemaise foi o Afioga i Minisita Lagolago aemaise foi lenei Itu. Susu atu o le matou Taitai aemaise sui usufono uma o le Maota, avanoa foi e faafeiloai atu ai i paia o Faauluuluga o Matagaluega ma Faalapotopotoga a le Malo aemaise foi o nisi o Malo Faaaloologia ma nisi foi o malu o le atunuu o loo faapea ona molimauina le tatou usugafono i lenei taeao. O se avanoa taua foi lea e faafeiloai atu ai ile Afioga ile sui usufono o Vaimauga 3 ia Lautimuia Afoa Uelese Vaai ia faamanuia atu i lou pale mai aua le Itumalo ma lona nofoa.

Ou te iloa o se avanoa foi lenei lau Afioga i le Fofoga Fetalai e toe faaleoina ai foi o lea ua saunoa le Taitaifono o le Komiti o Tupe Maua a le tatou Maota e toe faaleo atu ai le agaga o le faamaisega i le Afioga i le Sea ia Faanu Toomalatai. O se tasi foi o lupe faalele ao se taulaga soifua foi a lenei Nuu ma le Ekalesia, e pei ona tapena ai ona toe sauniga falelauasiga i le masina ua tea atu. E avatu ai faamaisega i le faletua ia Tasalautele aemaise le nofoaalo ma le paia o le Matagaluega i Liverpool i Ausetalia. Lau Afioga i le Fofoga Fetalai, o le manatu puupuu a lenei Itumalo e fia faaleo atu ai i le Lipoti ua lumamea nei. E i ai le tulaga lea o le NPF, aemaise o le Lipoti e pei ona tauaaoina i le tausaga faaletupe 2020 agai i le 2021.

O le agaga faafetai e faamua lea i le Minisita aemaise foi le Ofisa Sili o Pulega ma ona soatau e tusa ai foi ma galuega faatino e pei ona fofola mai i le Lipoti o lea ua talanoaina i luma o le Maota. E tele le agaga faafetai ona o lo o matauina o le vaitaimi lea o vevesi si o tatou atunuu aemaise o le lalolagi i tulaga o le faamai, Koviti-19. A o lea e matauina e i ai vaega ua faapena ona pagatia ai le atunuu ae i ai foi vaega faafiafia loto ona e ui i lava ina pau le aofai o tagata faisaoafaga mai le 33,000 i lalo o le 32,000 ona o aafiaga o le faamai, ma ua faaitiitia ai la tagata galulue ona o le tualga lea ua i ai e ua faamalolo ma galuega ona o aafiaga i kamupani ma faalapotopotoga sa faafaigaluegaina le mamalu o le atunuu ona o aafiaga o le tamaoauga i tupe maua ua le gafatia ai.

Ae i le vaitau lava lea o lea e maua i le Lipoti na sii maualuga le aofaiga o saofaga mai le mamalu o le aufaigaluega i a latou NPF, o lo o ua agai lea i luga i le ova atu i le \$114 toeitiiti lava \$115 miliona mai le \$99.9 miliona i le tausaga lea 2019 i le 2020. O lea siitaga e ui ina pau le numera o tagata faigaluega o lo o fisaofaga, ae o lo o alu i luga a latou saofaga o lo o avatu i totonu o le NPF. Ou te iloa o lea e aumai ai i i le Lipoti, o le vaitaimi foi lea ua effective le siitaga o totogi, lea sa siitia i le Paeaiga talu ai i le Kapeneta, ma o lea ua alu ae ai foi i luga saofaga a le aufaigaluega.

Ma e tele lava tulaga o lo o faapea ona faailo mai ma aumai i le Lipoti, pei ona saunoa ai foi nisi o sui usufono ua maea i tulaga o tatou tupe faasili mai tupe ia faafaigaluega. Ia aua e pei o le isi vaega tele lea o lo o maua mai seleni a le tatou NPF o tupe ia faafaigaluega, lea ua latalata lava i le \$86 miliona le tupe na maua mai ai. Ia, o tulaga uma ia e lagona ai lava le agaga faafetai ma le faagaetia i le galuega taupati a le Pulega aemaise foi le aufaigaluega a le NPF faapea foi le Komiti Faatonu.

O le tulaga pei ona taumafai atu ai se tualga o faafesili a lenei sui usufono, o tulaga ia e pei ona aumai i le Lipoti ma le Tali a le Malo i le pasene lea e taua o le pasene tuusao po o le kivi foi lea e taua o le dividend a sui usufono ona o lea e aumai le tali, o lo o totogi tuusao faamanuiaga nei i a outou saofaga i tausaga taitasi. Ia pau si mea lea e faafesili ai lou sui usufono, ona o lo o faalauiloa lava le aofai lea o dividends a le mamalu o le aufaigaluega lautele, o le tausaga lea pei lava e 8% lea sa tuuina atu i le aufaigaluega, ae le o maua la po o le mea foi... se i faasao mai au, pe entitle ai foi sui usufono i le 8% lea ia pe ese foi se latou pasene.

E pei o nai vaega ia e faafesili atu pea e fia manino ai lou sui usufono, pe 8% le mamalu o le aufaigaluega lautele, ae pe 9 pe 10 afioga i sui usufono. Ia pei o le tulaga lea e fia faamanino ai. O lo o i ai foi i le tulaga lea le talosaga. O lea ua saunoa Taitaifono o le Komiti lea o lo o nafa ma faamanuiaga ia faa-Palemene i le 15% lea e fautua mai ai le Komiti o Tupe e siitia ai i luga le saofaga a sui usufono. Ia o lea na saunoa foi le Taitai o lenei Itu, ia atonu e i ai se Lipoti e 17.3% sa recommend e se Consultant ua tau agai i ai saofaga a sui usufono. Ae maua foi ananei i le taimi sa fai ai le tatou malu taeao, sa talatalanoa foi ma isi sui usufono, e pei lava ua 20 ea la ua sii ai i luga le... ia se i uma faasao mai, ae ia na o se tala na maua i talatalanoaga ananei, i le vaega lea o le tatou justice, le vaega o faamasino. Ou te le i maua pe sao, ae pei e manaia lava e latalata foi le 17.3 i le 20. Ia ae ou te iloa o lea ua saunoa le Afioga i le Sui Fofoga Fetalai o le Taitaifono o le Komiti lea, ia atonu o le faafiafiaga lea o lea na saunoa i ai, atonu o le a aumai se tulaga faapea i se latou fautuaga e tusa ai foi ma lea vaega leaga o lea ua laga mai e le Komiti lea o Tupe le 15%. Ia atonu e tele se taumafaiga a le Komiti lea o lo o nafa ma faamanuiaga ia a le Palemene, le iloa pe oo atu ua o oi le 20%.

Ia lau afioga e pei o nai faafesili ia ua manatu lenei itumalo e taatia atu pea i ina e fia manino i ai, aemaise foi o le agaga o le faafetai pei ona tuuina atu i le Minisita, o le Komiti Faatonu aemaise foi o le Pulega ma le aufaigaluega a le NPF e tusa ai foi ma le Lipoti o lo o i lumamea nei. E ui lava i tulaga ua pagatia le atunuu i faamai ma tulaga uma faapea, faaitiitia le au galulue, a o lo o alualu pea i luma le taumafaiga o le faafaigaluegaina o tupe a le NPF ma maua mai ai tulaga o tupe faasili ia.

Ia o le taumafai atu lea a lenei itumalo. Ia manuia toega o le Fono, manuia lau Afioga i le Fofoga Fetalai. Faafetai.

**FOFOGA FETALAI:** Malo faafetai i le saunoaga a le sui usufono mamalu. Ia na o se fautuaga pea a le Nofoa, leaga o lea e fai ma aumai tatou talanoaga foi ia pe a tatou talatalanoa i le tatou malologa, e i ai lava le manatu o le Nofoa e lelei lava le aumai o faamatalaga mautu, leaga o lea e faafogafoga lava le Maota ma le atunuu. A o le fautuaga lena e avatu e le Nofoa i a outou Afioga i sui usufono mamalu, ia, vagana lava se mea ua mautinoa ona talanoaina lea ma aumai i luma o le Maota. Aua le aumaia ni mataupu foi ia sa talanoa ae le o mautinoa leaga e faaseseina ai le faafogaga a le atunuu.

A o se taimi saunoa manino le Afioga i le Minisita ma le Taitaifono, ia po o ai lava o i ai ia vaega ina ia faamanino lea vaega ne i taitaisese ai le faafogaga a le atunuu ma le Maota.

Ia se i tulai mai le sui usufono mo Vaimauga 1.

**Afioga SULAMANAIA FETAIAI TAUILILI TUIVASA:** Faafetai lava i lau Afioga i le Fofoga Fetalai. ia e faataua foi e lenei Itumalo Taitaifono ma latou Lipoti ua tuuina mai totonu o le Palemene. E momoli ai le agaga faafetai o lenei itumalo i lau Afioga i le Taitaifono o le Komiti o Tupe aemaise foi o le Ofisa Sili ma le Pulega o le NPF. E tau loa le NPF e fia talanoa uma ai lava tagata aua o le isi itutino lea o si o tatou Malo o lo o tua i ai le toatele o le atunuu. E talia foi ma le agaga faafetai le matamata atu a lenei itumalo i fautuaga a le Komiti pei o le tulaga o fautuaga muamua ina ia faamalosia le aoina o aitalafu. Ia o le tuualalo lava ina ia mafai ona silasila totoa le Matagaluega i le faatinoga o aitalafu, aua e maua ia a faapea e le o lelei le aoina o aitalafu, ia pe sa i ai ni aseta sa faamau ai aitalafu. O le tuualalo lena.

O le tulaga i le fautuaga lona lua, e avatu le faafetai i le tulaga lea. Masalo o Niu Sila e leai ni NPF, ae leai se tagata faigaluega i Niu Sila e le mafai ona maua e le IRD, ona e resitala uma lava tagata faigaluega. E tatau foi la ona faapena se vaai a le NPF i inei, o lea e faigaluega uma lava tagata. O le popolega lea e i ai i kamupani ia e le o mafai ona tuuina i totonu totogi po o NPF a le aufaigaluega po o e o lo o galulue ai. Ia maitauina foi o tatou tagata e uma loa e tatau ona alu i le NPF po ua fai sana... po o le a se mea

e entitle ai. O lau la tuualalo i le Komiti, ia se i taumafai e ave ni faasalaga i kamupani ia po o e foi o lo o faafaigaluegaina le mamalu o le atunuu ae le o mafai ona... le ituaiga mea foi lea na o le tipi lava o le NPF ma tuu. Ae tatau lava ona i ai ni tulaga a uma ia ma tulituliloaina pea kamupani nei e faafaigaluega ai tagata, ae le aveina le NPF i le mea e tatau ona ave i ai ina ia mafai ona agai atu le tagata faisaofoaga, o la e ua oo i luga lana saofaga lea e mafai ai ona toe fai sana nonogatupe.

O le tulaga ua aumai ai le fautuaga a le Komiti i fautuaga i sui usufono, ia e lagona lava le agaga faafetai ina ia mafai ona silasila ane i le tulaga lea i pasene, saofaga ia e tipi ai o tatou totogi. E le talanoa lava ona o lea e i ai le isi Komiti lea e saunoa ai le Sui Fofoga Fetalai, a o lea ua aumai totonu o le fautuaga a le Komiti o Tupe, ia e avatu lava le tuualalo a lenei itumalo. A faapea ua silasila ia tatou o Taitai o le atunuu, ia amatamea mai luga. Sii i luga le Ao o le Malo ina ia mafai ona entitle i le 30%, ia alu ifo ai i Sui Ao. E faapena, ia, alu ifo ai i a tatou o sui usufono. Leaga e pei e vaai maualalo ia tatou. A o le agaga ma le tuualalo, amata tatou i le 20, alu atu le Sui Ao i le 25, alu Le Ao o le Malo i le 30. Ae pei o lea e aumai e faapena se vaai i le 15. Ia o le taimi nei o lea e 10 tatou, ua laugatutusa tatou ma le mea lea e tipi ai, tulou, lea e o ai tagata faigaluega, a o tatou o Taitai o le atunuu. E tatau ona i luga lava se faatulagaga e mafai ona toe... pe toe i ai i totonu o le Palemene a o la e o atu o lava se faasoa e totoe mai totonu o le tatou NPF.

O le tulaga lena e fia avatu ai se talosaga a lenei sui usufono ae momoli le agaga faafetai pei ona ou taua foi i isi Tulafono, e faigofie lava pe a vaai atu le sui usufono o Vaimauga ua uma ona okika ma uma ona fai i ai le faaiuga lena. E leai lava se fesiligia. A o le agaga faafetai, a silasila atu foi i le tulaga na aumai ai le Lipoti a lenei Faalapotopotoga, ua siitia ai le tupe na aoina. E pei o le agaga lena o le faafetai a lenei itumalo i tulaga sa i ai le latou tupe sa aoina i le 2019/2020 e \$67 miliona, ae sau la le 2020/2021 e \$97 miliona. O lona uiga, o le faasiliga e \$30 miliona. O le agaga faafetai lena i le afaigaluega o lo o tua i ai si o tatou atunuu i le galulue punouai. O le agaga faafetai lena e faaoo atu e lenei itumalo ae lagolagoina e lenei itumalo, suia le 15% i le 20% mo sui usufono, Le Ao o le Malo, Sui o le Fono a Sui Tofia, ma afioga i Faamasino o le Faamasinoga. Ia manuia le Fono.

**FOFOGA FETALAI:** Malo faafetai. Ia, o lau Afioga foi o le sui o le tatou Komiti.

**Afioga ALAIASA MOEFAAUOUO MALAGAITUTOGIAI SEPULONA MOANANU (Anoamaa 1):** Faafetai i le avanoa i lau Afioga. O le Lipoti lea e fai ou te le i oo i le Komiti lau Afioga. E fou nei

lau Komiti ae sa saunia mai ai le Lipoti lea. Ae afai lava e i ai se feteenaiga ma lou finagalo...

**FOFOGA FETALAI:** Ia, ou te fesoasoani o oe o le tasi o sui usufono matua o le Maota, aua o tatou Tulafono Tumau lava ia, o ai lava e auai i le Komiti ia... Faatoa avanoa lava i le taimi foi lea e tali atu ai le Taitaifono, pei o le mea lea na tali mai ai Aliimalemanu, oka, o le manaia ia o le mea lena. A o le mea lena e fesoasoani atu ai i sui usufono o le tatou Komiti, ia ona o tatou Tulafono Tumau e le mafai foi ona tatou o ese ai. E faamalulu atu ai i le sui usufono mamalu.

**Afioga ALAIASA MOEFAAUOUO MALAGAITUTOGIAI SEPULONA MOANANU:** Ia afai e te finagalo o le a ou fesoasoani i saunoaga ia ua maea, o le a avatu le fesoasoani i ai.

**FOFOGA FETALAI:** Ia, atonu e i ai se taimi, se i saunoa foi le Taitaifono ona maua foi lea o se avanoa. O lea e matau atu lau Afioga i le Taitaifono na maua se avanoa foi o... Ia e faamalulu atu lau Afioga i le Taitaifono ua le iloa atu le toatolu lea i tua. Ia o le avanoa lena o le Igoamatua.

**Tofa ALE VENA ALE (Faleata 4):** Faafetai i lau Afioga i le Fofoga Fetalai. Ou te masalo ua maotua tele le matou nofoaga ua le silasila mai ai lau Afioga. Ia faafetai i lau Afioga i le Fofoga Fetalai ua maua se avanoa o lena usugafono. Ua i luma foi o le Atua le viiga ma le faafetai i lena taeao ua taitaiina ai tatou e lau Afioga. Ia, le paia foi ma le mamalu o le tapuaiga a le tatou atunuu aemaise foi le afio o le Tamaitai Palemia ma le Kapeneta ma le tatou Maota nei. Ia, soifua manuia i lena taeao.

Ae ua ou tulai atu ma le faaaloalo tele i lau Afioga i le Fofoga Fetalai, e fia faaleo foi le agaga faafetai e tusa ai ma le Komiti foi ua i lumamea nei o le Maota. Faafetai i le Afioga i le Komiti Faafoe faapea foi le Matagaluega a le NPF. Aua o Lipoti nei o Lipoti foi o le Paeauga na tea nei, o lea ua i lumamea nei o le tatou Maota nei. Ae momoli le agaga faafetai i le Matagaluega a le NPF aemaise le Pulega, le Komiti Faafoe faapea foi lau Afioga i le Minisita e tusa ai ma le galuega maeaea foi ma le faatautaia foi o lea foi... e pei ona tulei le sui usufono o le Vaimauga 1, a talanoa loa i le NPF, aua o le tele lava o le aufaigaluega a le Malo e tua lava i le NPF. Ma ua matauina i le Lipoti lena o lo o siisii pea i luga le tupe maua.

Lau Afioga i le Fofoga Fetalai, e fia fautuaina ina ia matua faatauaina lava le aufaisaofaga a le NPF, i latou uma lava nei, tagata uma o lo o... aua o tupe uma nei o lea e ave i totonu, o lea e faagaoioi ai uma, lea foi pei ona saunoa foi nisi sui usufono o lo o maua mai ai tupe faasili. E tatau lava la i

le NPF ona matua faatauaina lava le aufaisaofaga. Ma e matua lagolagoina e le sui usufono lenei le siitia o pasene o tufatufaga i le aufaisaofaga.

Lau Afioga i le Fofoga Fetalai, ua maitauina, ua suia le Tulafono lea, sa e faisaoafaga loa e entile loa i faamanuiaga, \$5,000 pe a faapea o le a le finagalo o le Atua. O lea ua sui nei, lea ua ou vaai atu o lea ua 2 tausaga. O le a le mea ua sui ai? O Afioga Paia a le Atua e tutusa lava le aso e 1 ma tausaga e tele. E toe fautuaina le NPF e toe tuu i le mea lenei. E pei lava ona ou fai atu, e faatauaina le aufaisaofaga. E te join loa today ma e amata faisaoafaga i le NPF, a e auai nei ae e oti taeao, you are entitled to that benefit, e tatau, its a must. O le a le mea e ala ai ona tuu se i 2 tausaga. Ia o Tulafono a nei lea ua oti ai foi tatou i le mea lea o le sui soo o na Tulafono lau Afioga i le Fofoga Fetalai.

O le fautuaga lenei i le Komiti Faafoe o le NPF, pe a tusa ai ma le tou finagalo. Ia ou te le toe fia tautala foi i nisi o mataupu ia pei ona i ai mataupu ua saunoa i ai nisi sui usufono, ae moni lelei lava i pasene ia o le penisione a tatou i le Palemene. Ia ona o le recommendation lea... o le konesale faapitoa na aumai fafo lea e i ai le latou fautuaga lea e 17.3%. A o lea foi ua saunoa le Taitaifono o le Komiti lea o le Tulafono Tumau o le a i ai se taimi, ia, atonu o le Lipoti lea o le 2019/2020, a o le Lipoti lea o le a sau nei a la outou Komiti lea o le a sau ai le fia lea, e matua talia ma le faafetai e le tatou Palemene.

Ia lau Afioga i le Fofoga Fetalai, o si sao puupuu lea e tuuina atu i le tatou mataupu foi ua i lumamea nei o le Maota. Ia faamanuia tele le Atua i toe taimi o totoe o le tatou fonotaga. Faafetai.

**FOFOGA FETALAI:** Malo faafetai. Ia, o le avanoa lenei i lau Afioga i le Taitaifono.

**Afioga FALEOMAVEGA TITIMAEA TAFUA:** E momoli atu le faamalo ma le faafetai i lau Afioga i le Fofoga Fetalai mo le avanoa. Faafetai foi i lau Afioga i le Taitai o le Itu Agai ae faapea foi lau Afioga Auapaau ma Fuaava faapea foi Sulamanaia ma le tama matua ia Ale, malo faafetai. Faafetai mo fautuaga. O le tele lava o nei vaega na outou aumaia e aumai faafautuaga ma le faamalo i le aufaigaluega. Malo faafetai. Ae se i amata atu lava la i le fesili lea a lau Afioga i le Taitai o le Itu Agai i le faamanuiaga foi lea faa-Palemene, le pasene lea pei ona e taua. O le a tali atu ai le Minisita pe a oo i le taimi e avatu ai lana tali. O le tulaga pei ona e fesiligia le pasene i le fautuaga lea e 15%. Ou te lagona o lenei e te aumaia le fesili, a o lenei tou te i ai i le Komiti lea pei ona saunoa Auapaau e tali faatasi atu ai le lua faasea ma Auapaau i le tulaga lea, faataatia a oo i le taimi e aumai ai le lua... tatou o i lenei aua o lea ua aumai i luma o le Palemene. Ae faafetai, malo lava le lagalaga i mea lelei, e le o se mea ua faaletonu, o lea ua matou avatua, a oo i le taimi e aumai ai le lua Lipoti, ae

faafetai tele lava o lea ua tali faatasi atu ai ma le fesili a Auapaau lau Afioga i le Taitai o le Itu Agai.

O le tulaga i le... manaia, faafetai mo le lagalaga i mea lelei lau Afioga i le Taitai faapea foi le Taitaifono o la outou Komiti. O lea ua maua atu ai o lena ua outou tapena i se isi vaega e sili atu, ia ailoga i se a e afaina lea tulaga. Malo faafetai. E oo foi i nai vaegatupe pei ona e taua o lo o invest i Ausetalia ma Fiti, e sao lelei lau saunoaga. Malo faafetai.

O le tulaga ia Fuaava, malo faafetai e tusa ai o le fesili i sui usufono. Ou te lagona o lena e lavea ai i ina ma le tali lava lea e tasi lea e tali faatasi atu e le Afioga i le Minisita le tulaga lea i faamanuiaga e faapena foi ma lau Afioga Sulamanaia lena e lavea faatasi atu ai pe a tali atu le Minisita i tulaga ia na fesiligia i tulaga o faamanuiaga o pasene a sui usufono.

O le tuualalo ma le faamalo a lau Afioga Ale, malo faafetai. O lea e matau atu o lena e i ai lava le lagolago ma le faamalo e tusa... O tulaga i le 2 tausaga lea na e saunoa ai i le fesuiaiga lea ua i ai, ia manaia le fautuaga, faaaatia mai. E faapena foi le fautuaga a Sulamanaia i lau tuualalo i le vaega lea e pei ona e taua o lea na aumai faafautuaga i le tatou NPF, ia o le tali lava e tasi, taatia mai lua finagalo ma Ale, o le a tilotilo i ai le tatou Komiti. Ae malo faafetai.

Ou te lagona masalo na pau ia o nai vaega o lea na lavea i faamatalaga na fesiligia e tatou, ae pei e tele lava i le faamalo ma le faafetai i le aufaigaluega o lo o faatinoina ia tiute ma galuega a le tatou Malo. O lea e momoli atu ai le faamalo ma le faafetai tele i sui usufono mamalu na afea ia tulaga.

Lau Afioga i le Fofoga Fetalai, faamanuia mai le Atua i taimi o totoe o lenei aso.

**FOFOGA FETALAI:** Malo faafetai i lau Afioga i le Taitaifono. Ia, lau Afioga i le sui usufono mamalu mai Anoamaa 1, o se tasi foi o sui usufono o le Komiti pe e te lagolagoina le tou Lipoti. Aumai sou finagalo.

**Afioga ALAIASA MOEFAAUOUO MALAGAITUTOGIAI SEPULONA MOANANU:** Faafetai i le matou Taitaifono mo lana faamalamalamaga, o lea ua ao faatasi manogi o le lolo e tusa ai foi o fautuaga. Ae pau lava lea o le mea leaga o lea na aumai i le Lipoti lea, o mea ia mo tatou, e tataua ona faataatiaese e i ai se Komiti e talanoaina nei mea, ae aua tatou te talanoa i inei, ona e matau eseese lava le atunuu. Ia te au la ia, o lea ua sau le tamaloa lea, aua o so o se pension fund lava, e manaomia ai le tagata lea e tau o le Actuary e sau e toe suesue ma fai lana lipoti lea. O le tagata la lea e le maua i Samoa, e malaga mai fafo, o lea la ua aumai lana fautuaga. Ae o le tatou Maota, o lea lava tatou te lauga i le taugata o le soifuaga. A toe tuu atu nei la le mea lea e naunau uma i ai sui usufono, ua atili ai le alu i luga o le tau o le soifuaga. A o mea na e

lomilomi malie e tatou i se taimi ma la u lea... O mea ia o penefiti, death benefit, manaia tele le fautuaga lea ua aumai e tatau ona toe iloilo e le Komiti Faafoe, ia a ua tatou iloa uma lava faalavelave ia e tutupu, e le toe gafatia e le tupe lea se taumafataga mo le faamoemoe. Ae se i toe silasila i ai le Komiti.

O lea foi na taua le mea lea i le Mulifanua Hotel, ia, o lea lava e vaai atu lava i tausaga uma e gau lava, gau lava. Ma e foliga mai lava o le tulaga la ua i ai le investment, ia lea ua tatou vaai uma lava i ai ua... ae se i toe suesue. E tatau ona fai se Komiti Suesue o lenei mea i lau lea vaai i ai i le agai i luma o le tatou... Leaga so o se \$1 lava e gau, e gau tupe a tagata. E taua le tatou putiputia o tupe a le atunuu e le... O tulaga ia o loan, o le members loan e alu e fai i le NPF, e laitiiti lava se avanoa e leaga ai, leaga e loan foi lea i luga o lana pasene o lana saofaga. Ae ala ona gau le NPF, o loan ia e tatala i tua i tagata lautele ma pisinisi. O lea la e tulai mai ai le mea lea, o lea ua uma na loan a o lea ua toe convert faa-share, ae o lea lava e leai se mea o ono tulai mai ai. So, e tatau la ona toe vaavaai i ai leaga e tele tele le tupe lea.

Ia pei o nai fesoasoani laiti ia lau Afioga sa... Ae lagolagoina lava le saunoaga a le matou Taitaifono. E pei o le toatele lava na o le faafetai lava. Ia e avefa foi la lenei avanoa e faafetai ai i le Pulega a le NPF ma le aufaigaluega, malo galulue. Ae se i toe vaavaai lelei tatou pasene ia e faaalu faaalu faaalu. E amata loa ona e aumaia le general reserve e faatino ai mea nei, e iloa loa i ina ua amata ona faaletonu, ua ova le faaalu. E tatau lava ona fuafua le faaalu ia aua ne i toe aumaia tupe foi ia i o i le tatou reserve e faatino ai mea ia ua tatou pasia.

Ia manuia tele lau Afioga i le Fofoga Fetalai, manuia foi le Kapeneta, le Tamaitai Palemia, aemaise le tatou Fono. Soifua ma ia manuia.

**FOFOGA FETALAI:** Malo faafetai saunoa ia ma fesoasoani foi i le Taitaifono ma la outou Komiti, ia malo lava galulue. Faafetai o lea ua manino mai lea vaega. E maitau atu, Aliimalemanu se i toe tulai mai.

**Afioga ALIIMALEMANU MOTI MOMOEMAUSU ALOFA TUUAU:** Lau Afioga i le Fofoga Fetalai, o se faaopoopoga laitiiti lava i le matou Lipoti ona ua pau mai ae o lea ua uma ona saunoa nisi o sui usufono mamalu, i le mataupu lea na laga i le faletalimalo i Mulifanua. O le tulaga lea e i ai lea sa \$23 miliona a o lea ua taua e le sui usufono na se i mavae atu nei le tulaga lea i le faaliliu o le nogatupe agai i sea. O lea foi o lo o maua i totonu o Lipoti, o lea sa \$23 miliona le sea i le 2020 pau mai lea i le \$17 miliona, pau mai lea i le \$8 miliona i le tausaga na tea nei.

Mo le silafia e le Maota lenei, e i ai metotia o lo o faaoga e le NPF e fua ai, e value ai sea o kamupani uma nei olo o faisea i ai le tatou NPF. O lo o fua la i tausaga uma. O le mea foi la lena ona o tulaga o lo o i ai i le leai o

nisi e nonofo ai i le faletalimalo ma le tulaga pei ona silafia i le Koviti-19, ua pau ai foi la i lalo le value o le faletalimalo ua faapea foi ona pau ai i lalo a tatou sea mo le silafia. E le o ni tupe pau, o le pau o le value o le share, ia faamalamalama. O lea la ua uma na fai le fautuaga a le Komiti Tupe, atonu o le isi Lipoti e aua ne i toe value ina i tausaga taitasi ona e tele tupe e alu ai a le NPF, e taugata. Ae taumafai aua o le standard lava ia faa-galuega faa-Suetusi, faa-Tausitusi, o le 5 lava tausaga ma value tatou aseta. E tatau foi ona tau alu faapena le value ina o shares i mea nei o faletalimalo, ina ia tuuitiitia ai le mea lea o le oso i luga pau i lalo, oso i luga pau i lalo share i totonu o pisinisi nei e i ai share o le NPF. Ma le faaaloalo lava o le toe faaopopo atu lea.

**FOFOGA FETALAI:** Malo faafetai mo le faasoia i la outou Komiti ua malamalama atili ai foi le tatou Maota.

Ia lau Afioga i le Sui Minisita se i saunoa mai.

**Afioga Hon LEOTA LAKI LAMOSITELE:** Faafetai mo le avanoa i lau Afioga i le Fofoga Fetalai. Ia, ou te talitonu lava o lea ua tele foi ina manino mai tali foi a le tatou Komiti e tusa ai foi ma mataupu sa laga e sui usufono mamalu. Ou te iloa o isi lava mataupu ia lea ua faataua i le faalogologo atu ia e tai pei la o aitalafu. E pei lava o lea e faasaga le vaega lea i mea o tupe le tologia foi ia a le aufaisaofaga, lea la e faaigoa o arrears e faatatau agai i kamupani po o employers foi ia e le o tologia maia latou saofaga a le aufaigaluega i totonu i le taimi e tatau ona totogi ai, e ese mai arrears po o tupe lea e tuai ona totogi mai i mea o faiga nogatupe ia ua uma foi ona saunoa i ai isi sui usufono. o lea foi ua maua atu le tulaga lea i le dividend, ma fautuaga ia e aumai, o le a se i silasila i ai le tatou Ofisa ma le Komiti Faatonu i le tulaga e aumai ai foi se fautuaga e talafeagai, aua o lea ua ou vaai atu o lea ua sii mai i le 15% ia alu i luga i le 17%. Ia o nei mea uma o tupe lava mea e alu ai. Tou te iloa fai mai le isi toeaia, vaai tatou i gau.

O lona uiga o lau tala, ia e faapena foi ona tilotilo lelei le Malo po o talafeagai ia fautuaga o lo o aumai po o Konesale po o le Ofisa ina ia mafai ona faaauau, ona faaauau pea le auaunaga e pei ona faataatia ai. O lea ua maua atu ia le tatou dividend le tufatufaga lea na sau talu ai foi ia e 1%. Ia o lo o i ai foi ma le talosaga na aumai po o le a le mea e le tuutuu ai i luga? Ia a fai o lea e aumai ia le 10%. Ia o le a le mea e tuu ai? A fai o le a e fai atu lava ia tatou fuainumera o talafeagai lava, ia o le tulaga na e i ai.

Ua leva le NPF, ua ova ma le 50 tausaga talu ona amata le tatou NPF. Ia ae o lea faatoa oo mai i le 8% dividend talu ona amata mai. Ia o lona lava e tou te silafia ia mafuaaga e ala ai ona tuuitiitia mo mea o tupe tala foi ia. Ae o galuega la lea o le a toe tagai atu i ai ia le tatou Ofisa i fautuaga foi a

le Malo ina ai toe tagai lelei i ai i faatinoga lea ina ia siitia ai foi i luga ia faamanuiaga ma le tamaoaiga o le tatou atunuu.

Ia o le tulaga lea i le tatou faletalimalo lea, ia o lea ua aumai foi le fautuaga a le tatou Komiti, ou te masalo o se vaega o le a tilotilo totoa i ai ia le tatou Ofisa aemaise o le Komiti Faatonu i ni auala e taumafai e faaitiitia ia le tulaga faaletonu o lo o taatia ai le faletalimalo lea. Ia aua e tusa lava po o le a le tele o isi tupe maua ia e aumai i dividends mai isi Investments ia e fai, e tasi lava ia le gau tele lea e i totonu i i, o le mea lena o lea e laitiiti ai ia le tatou dividend ona e le o fua tutusa mai ia le fua mai mo mea o tupe ia e faagaioi ai ia le tatou Faalapotopotoga.

E i ai isi vaega e maualuga ae e i ai isi vaega o la e maualalo. Ae o le mafuaaga la lena o lea e femeimeiai solo mea o dividend mai i lea tausaga i lea tausaga. Ae faafetai mo le fautuaga o lea ua maua lelei atu e le tatou Ofisa ma le Komiti Faatonu faapea foi ma le Malo. O le a galulue agai i ai i se tulaga e taumafai ai ina ia lelei atili ia le auunaga a le tatou NPF.

Ma le faaaloalo lava, faafetai.

**FOFOGA FETALAI:** Faafetai i le saunoaga a lau afioga i le Sui Minisita. Ia o le avanoa lea mo lau afioga i le Taitaifono mo le tatou Lafo.

**Afioga FALEOMAVAEGA TITIMAEA TAFUA:** Faafetai i lau Afioga i le Fofoga Fetalai. Lau afioga i le Fofoga Fetalai, ou te faatu le lafo, *Ina ia faamaonia e le Fono Aoao le P.P. 2022/2023 Nu.12, Lipoti a le Komiti o Tupe Maua ma Tupe Totogi i le P.P. 2021/2022 Nu.17, Lipoti Faaletausaga a le Faaputugatupe mo le Lumanai Manuia o Tagata Samoa mo le Tausaga Faaletupe 2020/2021.*

*Faaluaina e le sui usufono mo Lefaga ma Faleaseela.*

*Na faamaonia le lafo.*

**FOFOGA FETALAI:** Tulai mai lau afioga i le Sui Minisita mo le lafo i le Lipoti a le Malo.

**Afioga Hon LEOTA LAKI LAMOSITELE:** Lau afioga i le Fofoga Fetalai, ou te faatu le lafo, *Ina ia faamaonia e le Fono Aoao Tali a le Malo i Fautuaga a le Komiti o Tupe Maua ma Tupe Totogi, e pei ona tolaulauina*

*Faaluaina e le Minisita mo Leoleo ma Falepuipui ma le Pulega o Tinei Mu ma Faalavelave Tutupu Faafuasei ma le Minisita mo le Soifua Maloloina.*

*Na faamaonia Tali a le Malo.*

**P.P.2022/2023 NU. 13, LIPOTI A LE KOMITI O TUPE MAUA MA TUPE TOTOGI I LE P.P.2020/2021 NU. 68, LIPOTI FAALETAUSAGA A LE FAAPUTUGATUPE MO LE LUMANAI MANUIA O TAGATA SAMOA MO LE LUMANAI MANUIA O TAGATA SAMOA MO LE TAUSAGA FAALETUPE 2019/2020 - ILOILOGA**

**P.P.2022/2023 NU.76, TALI A LE MALO I LE P.P.2022/2023 NU.13, LIPOTI A LE KOMITI O TUPE MAUA MA TUPE TOTOGI I LE P.P.2020/2023 NU. 68, LIPOTI FAALETAUSAGA A LE FAAPUTUGATUPE MO LE LUMANAI MANUIA O TAGATA SAMOA MO LE TAUSAGA FAALETUPE 2019/2020.**

**FOFOGA FETALAI:** Tulai mai lau afioga i le Taitaifono o le Komiti o Tupe Maua ma Tupe Totogi.

**Afioga FALEOMAVAEGA TITIMAEA TAFUA:** Lau afioga i le Fofoga Fetalai, ou te faatu le lafo, *Ina ia faautagia e le Fono Aoao le Lipoti a le Komiti o Tupe Maua ma Tupe Totogi, o lo o tuuina atu ai ana Sailiiliga, Fautuaga ma Iugafono.*

*Faaluaina e le Sui usufono mamalu mai Lefaga ma Faleaseela ma le sui usufono o Aana Alofi Nu.1.*

*Na faamaonia le lafo.*

**FOFOGA FETALAI:** Ou te tapa lau afioga i le Taitaifono mo le tolaulauina o Sailiiliga, Fautuaga ma Iugafono a le Komiti.

**Afioga FALEOMAVAEGA TITIMAEA TAFUA:** Faafetai mo le avanoa i lau afioga i le Fofoga Fetalai. O le aotelega o sailiiliga a le Komiti. Lau afioga i le Fofoga Fetalai, o se aotelega lenei o sailiiliga a le Komiti i le Lipoti Faaletausaga o Faaputugatupe mo le Lumanai Manuia o Tagata Samoa, NPF 2019/2020. Ma na faamauina ai tupe maua a le Faalapotopotoga, e \$67 miliona. O tupe faaalu a le Faalapotopotoga e \$7.2 miliona

**6.3 TUPE FAASILILI 2019/2020:**

E \$52.4 miliona mai i tupe na faafaigaluega mai tupe mai i saofaga.

**6.4 MATATIA MA GALUEGA AUSIA:**

Na faamauina e le Komiti le 9.1% o le tului faameaalofa mo le aufaisaofaga i le 2019/2020, e tusa lea ma le \$64.5 miliona le vaegatupe na tuuina atu. Na faaailoa e le Pulega, e \$43.2miliona le vaegatupe na totogi sa'o atu i sui faisaofaga (cash out).

Na maua e le Komiti le faaitiitia o le aofai o sui faisaofaga faigaluega pea (active members) mai le 35,052 i le 2018/2019 i le 33,182 i le 2019/2020.

### **Faamanuiaga & Faamamaavega Tuuina atu e le Faalapotopotoga ona o Afiaga o le Koviti-19.**

Sa faamauina e le Komiti vaega sa fesoasoani ai le Faalapotopotoga e aofia ai:

- E 6 masina sa faapafala ai saofaga totogi mo pisinisi tumaoti, e patino i auaunaga tau faletalimalo tagata tafafao maimoa mai fafo ma faleaiga;
  - E 160 pisinisi sa faaaogaina lenei avanoa.
- Totogiina atu o le penisione faapitoa e tai **\$300** mo tagata penisione uma ua resitala. E 10,821 le aofai o tagata penisione sa faamanuiaina i lea fesoasoani ma na faaaluina ai le aofaiga e **\$3,246,300**.
- Toe faafoi totogi o nonogatupe (loan repayment refunds) mo le masina atoa o Mati. E 7,523 i latou sa faaaogaina lenei avanoa ma na faaaluina ai se vaegatupe **\$2,282,069.55**.
- E tai 20% o saofaga mama na mafai ona tuuina atu mo le aufaisaofaga sa faamuta galuega ona o aafiaga o le Koviti-19. E 538 sui na faaaogaina lenei avanoa ma na faaaluina ai le vaegatupe e **\$542,987**.

### **FAUTUAGA:**

1. E fautuaina e le Komiti le Faalapotopotoga, ina ia faia ni teuteuga talafeagai o le Tulafono Autu ina ia laugatasia ai faamanuiaga o tagata faigaluega ma le mamalu o le atunuu o lo o faisaofaga tuusaunoa (voluntary members) e aofia ai le aufai faatoaga/faifaiva, faifeau, tagata faigaluega i galuega faavaitaimi (RSE) ma isi.
2. E fautuaina e le Komiti le Faalapotopotoga, e fai ni faalauiloa o faamanuiaga e agavaa i ai le aufaisaofaga tuusaunoa (voluntary member) ina ia mafai ona faataua e lea foi vaega o le mamalu o le atunuu e le gata i Samoa nei ao fafo atu, e o lo o fia avea ma faisaofaga tuusaunoa mo le Faalapotopotoga aua le lumanai manuia o tagata taitoatasi, aiga ma nuu ae faapea foi tupe maua a le NPF.
3. E fautuaina e le Komiti le Faalapotopotoga ina ia Iloilo pe o mautinoa e le aufaisaofaga o lo o malupuipua ma saogalemu faatinoga tau tupe i luga o auala faatekonolosi (online transactions).

**IUGAFONO:**

I le maea ai o iloiloga a le Komiti e fautuaina le Fono Aoao, ina ia faamaonia:

*P.P. 2020/2021 Nu.68, Lipoti Faaletausaga a le Faaputugatupe mo le Lumanai Manuia o Tagata Samoa mo le Tausaga Faaletupe na faaiuina i le Aso 30 Iuni 2020.*

Ma le faaaloalo lava.

**FOFOGA FETALAI:** Malo. Faafetai i lau afioga i le Taitaifono. Ia e tapa lau afioga i le Sui Minisita o le tatou NPF mo le tali a le tatou Malo.

**Afioga Hon LEOTA LAMKI LAMOSITELE:** Lau afioga i le Fofoga Fetalai, e tulai atu ma le faaaloalo, e tuuina atu ia tali e pei ona fesiligia e le Komiti.

**FAUTUAGA:**

1. E fautuaina e le Komiti le Faalapotopotoga, ina ia faia ni teuteuga talafeagai o le Tulafono Autu ina ia laugatasia ai faamanuiaga o tagata faigaluega ma le mamalu o le atunuu o lo o faisao-faga tuusaunoa (voluntary members) e aofia ai le aufai faatoaga/faifaiva, faifeau, tagata faigaluega i galuega faavaitaimi (RSE) ma isi.

**Tali:**

Ua faamauina le fautuaga. O le a tuuina atu le fautuaga i le Komiti Faatonu mo le iloiloia.

2. E fautuaina e le Komiti le Faalapotopotoga, e fai ni faalauiloa o faamanuiaga e agavaa i ai le aufaisaofaga tuusaunoa (voluntary member) ina ia mafai ona faataua e lea foi vaega o le mamalu o le atunuu e le gata i Samoa nei ao fafo atu, e o lo o fia avea ma faisao-faga tuusaunoa mo le Faalapotopotoga aua le lumanai manuia o tagata taitoatasi, aiga ma nuu ae faapea foi tupe maua a le NPF.

**Tali:**

Ua faamauina le fautuaga. Ua i ai le faasiliga o le numera o Pepa o Faamatalaga ma polokalame faalauiloa a le Faalapotopotoga mai le 3 tausaga talu ai, ma e i ai le naunautaiga o le a faaauau ai faapea. O lo o i ai foi ni fuafugaga ina ia i ai ni Ofisa laiti po o se isi lala

mo le faalateleina o auaunaga mo aufaisaofaga tuusaunoa i atunuuil fafo e amata i Aukilani, Niu Sila

3. E fautuaina e le Komiti le Faalapotopotoga ina ia Iloilo pe o mautinoa e le aufaisaofaga o lo o malupuipua ma saogalemu faatinoga tau tupe i luga o auala faatekonolosi (online transactions).

**Tali:**

Ua faamauina le fautuaga. O lo o maualuga le tulaga o lo o malupuipua ma saogalemu ai auala o lo o faatino ai galuega a le Faalapotopotoga i auala faatekonolosi.

Ma le faaaloalo lava.

**FOFOGA FETALAI:** Malo, faafetai i le saunoaga faamalamalama a lau afioga i le Sui Minisita o le NPF, ia aua le Tali a le tatou Malo. Ia o le avanoa leni i se tasi o le tatou Maota e fia saunoa i le Lipoti a le Komiti aemaise foi ia le Tali a le Malo.

Ia tulai mai lau Afioga i le Taitai o le Itu Agai.

**Tofa Hon LAUOFO FONOTOE NUAFESILI PIERRE LAUOFO:** Ia, faafetai i lau afioga i le Fofoga Fetalai. Ia e pei o lea e matau atu e pei e tai tutusa lava ia le Lipoti lea na se i mavae nei ma le Lipoti leni. Ia ae o vaega ia e fia oo i ai se tautalaga lau afioga i le Fofoga Fetalai, o mo tului, pasene foi ia mo interest rate o lo o tuuina atu i le aufaisaofaga o lo o faia ia latou nonogatupe.

E manatua foi e le o po se lilo o le aufaisaofaga, o tupe ia e i totonu o le NPF o tupe a le aufaisaofaga. Ia ae o lea e matau atu, i le faisaoafaga, a fai o small loan, e 9.5% le tului i le tausaga i le small loan, 9.5%. O le tagata la lena faisaoafaga o i ai, e mafai ona nono i tua le 50% o lana saofaga i le 9.5% le tului. O Short Term Loans, ia e mafai ona tala i tua pe nono le 15% o le saofaga a le tagata faisaoafaga i le 12% le tului i le 3 tausaga, 12%.

Pe a silasila lau afioga i le Taitaifono ma le Minisita, o tului o mo mea o loans ia tetele lea e faaupu o large loans, masalo o loans ia nonogatupe ia e fai e mo mea o Kamupani ma mea o Investors foi ia e o lo o invest i ai tupe a le tatou NPF o tupe a le aufaisaofaga, e na o le 9%. Se i silasila ane, o le fautuaga, se i toe tagai, ona e i ai le talitonuga ma le lagona, o tupe lava ia a le aufaisaofaga, e tatau ona toe tuutuu i lalo ia le latou tului. Ae o le vaega la lea mai i tua lea o le aufai pisinisi ma mea o Investors, ia e tatau ona maualuga atu ia le latou tului, na i lo tului ia e tuu i luga a le aufaisaofaga aua o le aufaisaofaga, o latou tupe lava ia.

Ia se i silasila ane i ai lau afioga. Ia o lea foi e matau atu i le Lipoti Faaletausaga lea e i ai le tupe foi lea e totogi i le au penisione, e 1 lava ia le one off lea e tau mai e \$300. Ia e le mafai ona faaauau ia lena \$300? E ese le manaia ae mafai ona faaauau aua o lea e vaai atu o lea e siisii pea i luga ia tupe faasili a le tatou NPF.

Ia e pei o le talanoa atu lena ma le faaaloalo.

**FOFOGA FETALAI:** Malo faafetai mo le sao foi o le Taitai o le Itu Agai e tusa ai foi ma le Lipoti a le Komiti. Ia matau atu lau afioga i le Taitaifono o lea ua na o le Taitai o le Itu Agai ia mo le faamalamalamaga mo nisi o mataupu sa laga e le sui usufono mamalu le afioga i le Taitai o le Itu Agai.

**Afioga FALEOMAVEGA TITIMAEA TAFUA:** Ia malo faafetai. E momoli atu le faamalo i lau afioga i le Taitai o le Itu Agai.

Ia e amata atu le tali i le tatou small loan lea e 9.2%. O le faatalatalanoaga ma le Pulega na matou faatalanoaina, o le latou... sa ave i ai ia le matou fautuaga. O le latou mau na aumai, o latou e pito laitiiti lava ia le latou pasene i totonu o faletupe uma. Ia sa faapena foi la ona ou toe tali lava i ai mo le silafia e le mamalu o le tatou Palemene.

Na ou toe tali foi lava i le Pulega, e leai la e le o latou e maualalo le interest. E i ai isi faletupe i pasene ia, e 8% le latou... ia ona tuu mai lea o le latou tali, ae o atugaluga uma ia e te tuuina mai lau afioga, sa faapena ona oo uma i ai ia matou talatalanoaga. Ae o lea e manaia ia lau fautuaga o le a tilotilo i ai le... ma toe tuu atu se fautuaga i le latou Komiti Faatonu. Ae malo faafetai mo lau fautuaga.

O le fautuaga i le 15% lea i le 3 tausaga, ia ou te tau matau i le vaega lea, e pei lava o tatou Kamupani ia e tetele ia latou nonogatupe. O lea aufai pisinisi lea e ave i ai ia le 15%. Ae o le 9.2% lea, ia e na o tatou tagata faigaluega o lo o nono ia latou tupe i luga o latou faisaofaga.

O lau saunoaga i le \$300 e faa one off mo le fesoasoani ona o le faamai, ia taatia mai ia lau fautuaga. O le a se i toe tuu atu i le Komiti Faatonu, atonu o le isi a tatou Fonotaga, ia ua maua atu se tali lelei e faafiafiaina ai le paia ma le mamalu o le tatou atunuu aemaise foi o le aufaafofoga. Faafetai lava.

**FOFOGA FETALAI:** Malo, faafetai lava i lau afioga i le Taitaifono, tulai mail au afioga... e i ai se isi mea lau afioga i le Taitai o le Itu Agai?

**Tofa Hon LAUOFO FONOTOE NUAFESILI PIERRE LAUOFO:** Lau afioga, e na ona faamanino atu lava si vaega lea, o lea ou te faalogo atu... masalo e le i maua lelei e le afioga i le Taitaifono... e sauni le afioga i le Minisita e tali mai, o le 15% lea sa ou taua o short loans, e mafai ona

tala i tua pe nono i tua, 15% o lau saofaga. Ao le tului e tuu ai i luga, sa nono, e 12%. E pei o le uiga na o le fesili na fai atu, ona mo mea o Kamupani tetele, e laitiiti le tului e ave iai, ae o tagata faisafaga e ana tupe, e maualuga tului la e ave i ai.

Se i silasila ane faamolemole o lea e avatu faafautuaga se i silasila ane i ai, faafetai.

**FOFOGA FETALAI:** Ia se i tulai mai lau afioga i le Taitaifono.

**Afioga FALEOMAVEGA TITIMAEA TAFUA:** Ia malo faafetai, o lea ua faamauina i lalo o lea ua ou toe maua o le Short Term Loans lea e i ai le vaega lea. O lea e faamatuu iai le 15% o le aufaisafaga. Ia ae faafetai mo le fautuaga, talia ma le fiafia, faafetai.

**FOFOGA FETALAI:** Ia, lau afioga i le Sui Minisita o le NPF.

**Afioga Hon LEOTA LAKI LAMOSITELE:** O le tulaga lea e aumai ai le finagalo i le maualuga o le tului mo nonogatupe laiti ia, i lona aotelega lava i totonu o le Industry nei, e tetele lava ina ia... e taugata lava ia le faatinoga o le galuega o mea tau nonogatupe e... aemaise lava pe a faapea o mo tamai small loan o nonogatupe laiti.

E taugata lona administration ae laitiiti le tupe e maua mai ai. E le faapea la o avatu ai se faamatalaga a mea e solo atoa le ia le talitonuga lea i isi faletupe. Ia aua o lea e maua atu le fautuaga, o sui o le tatou faisafaga lea e ave i ai. Ia lea foi la e tilotilo atu iai, o le vaega lea e 12% ia o lea e ave iai ae 15% mea e faagata ai.

O le range mo mea o latou tului ia e faatulaga mai e le NPF, o le mea muamua lava ina ia taumafai e ina ia maua se tupe faasili e maua mai ai ia tatou dividend i le tausaga. A oo la i le taimi e tatou te tagisa e tuutuu i lalo ia tului o nonogatupe e pei ona faamama avega ai i tatou sui, a sau foi ia le faamatalaga tau tupe i faaiuga o le tausaga, e maualalo la ia le dividend e maua ai, ona o le tulaga na ua laitiiti ia le net income, tupe faasili e maua mai i le tului.

E pei o le mea la lene e tau avatu ai se faamatalaga o le mafuaaga o lea e faatulaga ai e le NPF ia latou nonogatupe i le taimi lenei. Ae faafetai mo le fautauaga o lea ua maua atu le fautuaga o se matafaioi sei toe tilotilo totoa i ai le Komiti faatonu, i le faatulagaga o latou tului ia, i sui o le au faisafaga. Aua o le vaega lea e i lalo ifo, o lea e faapea o nonogatupe faapisinisi e pau i lalo, ae tele, e ala foi ona tuutuu i lalo ona o le tele o le loan la ua ave i ai, e umi foi le taimi e totogi mai ai le aitalafu lea, ma tele ai foi le faaputugatupe a le faalapotopotoga ona o le tetele o latou repayments la e aumai. O le faatinoga lava la e masani ona feagai ma faletupe uma, o lea e faapena ai foi le NPF. E pau lava le tulaga lea e tagai

i ai le NPF, ina ia taumafai foi e fai fuafua le faatinoga o le auaunaga lea i nonogatupe, ina ia mafai ona saofaga uma i ai i latou o lo o manaomia ia fesoasoani faapea. Ou te masalo o le faamalamalama lena o le mataupu lea e faaopoopo atu i le saunaoga a le Taitaifono, aua o isi mataupu uma, ua uma ona tagofia e isi tausaga faaletupe ia na tatou talanoa muamua ai. Ma le faaaloalo.

**FOFOGA FETALAI:** O lea ua saunoa le Minisita, o lea ua faamau i lalo le tele o fautuaga ua tuuina mai. Lau afioga i le Taitaifono ou te tapa lau afioga mo le lafo.

**Afioga FALEOMAVAEGA TITIMAEA TAFUA:** Lau afioga i le Fofoga Fetalai, ou te faatu le lafo, *Ina ia faamaonia e le Fono Aoa P.P.2022/2023 Nu. 13, Lipoti a le Komiti o Tupe Maua ma Tupe Totogi i le P.P.2020/2021 Nu. 68, Lipoti Faaletausaga a le Faaputugatupe mo le Lumanai Manuia o Tagatanuu o Samoa mo le Tausaga Faaletupe 2019/2020.*

*Faaluaina e le sui usufono mo Aana Alofi 1 ma le sui usufono mo Safata 2.*

*Na faamaonia le lafo.*

**FOFOGA FETALAI:** Ou te tapa lau afioga i le Sui Minisita mo le lafo i le Tali a le Malo.

**Afioga Hon LEOTA LAKI LAMOSITELE:** Lau Afioga i le Fofoga Fetalai, ou te faatu le lafo, *Ina ia faamaonia e le Fono Aoa Tali a le Malo i Fautuaga a Tupe Maua ma Tupe Totogi e pei ona tolaulauina atu.*

*Faaluaina e le Minisita mo le Soifua Maloloina, ma le Minisita o Leoleo ma le Falepuipui, Pulega o Tineimu ma Faalavelave Tutupu Faafuasei.*

*Na faamaonia le Tali a le Malo.*

**P.P.2022/2023 Nu 14, LIPOTI A LE KOMITI O TUPE MAUA MA TUPE TOTOGI I LE P.P.2020/2021 Nu 78, & P.P. 2021/2022 Nu 33, LIPOTI O FAAMATALAGA MA TALA O TUPE A LE FAAPUTUGA TUPE O FAAMANUIAGA O TAGATANUU**

## **MATUTUA O SAMOA MO TAUSAGA FAALETUPE 2019/2020 & 2020/2021.**

**P.P.2022/2023 Nu 77 TALI A LE MALO I LE P.P.2022/2023 Nu 14, LIPOTI A LE KOMITI O TUPE MAUA MA TUPE TOTOGI I LE P.P.2020/2021Nu,78 & P.P.2021/2022 Nu 33, LIPOTI O FAAMATALAGA MA TALA O TUPE A LE FAAPUTUGA TUPE O FAAMANUIAGA O TAGATANUU MATUTUA O SAMOA MO TAUSAGA FAALETUPE 2019/2020 & 2020/2021.**

**FOFOGA FETALAI:** Tulai mai lau afioga i le Taitaifono o le Komiti o Tupe Maua ma Tupe Totogi.

**Afioga FALEOMAVAEGA TITIMAEA TAFUA:** Lau Afioga i le Fofoga Fetalai, ou te faatu le lafo, *Ina ia faautagia e le Fono Aoao le lipoti a le Komiti o Tupe Maua ma Tupe Totogi, o le a tuuina atu ai ana Sailiiliga, Fautuaga ma Iugafono.*

*Faaluaina e le sui usufono mo Lefaga ma Faleaseela, sui usufono mo Salega 1 ma le sui usufono mo Aana Alofi 1.*

*Na faamaonia le lafo.*

**FOFOGA FETALAI:** Ou te tapa lau afioga i le Taitaifono mo le tolaulauina o Sailiiliga, Fautuaga ma Iugafono a le Komiti.

**Afioga FALEOMAVAEGA TITIMAEA TAFUA:** Lau afioga i le Fofoga Fetalai, o sina aotelega o sailiiliga a le Komiti. E tau lava ina ou faailo ia sailiiliga a le Komiti i lipoti faaletausaga a le Faaputugatupe o Faamanuiaga o Tagatanuu Matutua o Samoa 2019/2020 ma le 2020/2021. Mo le nofo silafia e le Maota.

O le lipoti faaletausaga a le 2019/2020 a le Faaputugatupe, na faamauina ai le fesoasoani a le Malo, e \$19.2 miliona, e faatupeina ai ana galuega faatino faatasi ai ma le vaegatupe faaopopo e \$3 miliona mo le Koviti-19, aua se fesoasoani mo tatou tagata matutua.

O tupe faaalu a le Faaputugatupe e \$24.7 miliona. O le tausaga faaletupe 2020/2021, na faatatauina ai le \$27,088,308 mo galuega faatino a le Faaputugatupe faatasi ai ma le vaegatupe faaopopo e \$1,100,000 e tauala mai le fesoasoani lona lua o le Koviti-19. O tupe faaalu a le Faaputugatupe i le 2020/2021, e \$25 miliona.

### **Aotelega o Tupe Maua ma Tupe Faaalu 2019/2020 & 2020/2021:**

I le aotelega o tupe maua ma tupe faaalu, na faamauina ai le \$2.3 miliona o tupe pau (loss) i le 2019/2020. Peitai i le tausaga 2020/2021, na siitia ai

ana tupe faasili o tupe faaoga nai lo tupe maua i le \$3.2 miliona ma faamauina ai ana tupe faasili faaputupu e \$758,203, i le aso 30 o Iuni 2021.

**Tautua Faasoifua Maloloina:**

Na matauina e le Komiti le faaauau pea o sootaga faapaaga a le Faaputugatupe ma le Matagaluega o Soifua Maloloina i le tautuaina o le au matutua penisione mo le vaaia o fomai (consultation) ma le talaina o vailaau i faletalavai a le Malo. O lo o faatinoina foi lenei auaunaga i falemai faaitumalo i alalafaga i tua.

**Tautua tau femalagaiga:**

O lo o faaauauina foi le tautua a le Faaputugatupe e ala i auaunaga tau femalagaiga i le va o Upolu ma Savaii mo tatou tagata matutua, e faaogaina ai le a latou IDs penisione e aunoa ma se totogi.

**FAUTUAGA:**

E fautuaina e le Komiti le Ofisa ina ia galulue faatasi ma sui o nuu (Pulenuu) ina ia lipoti mai faamaumauga o numera o tagata maliliu ma tagata malaga i atunuu e mamao, ina ia faamautinoa le aofai o penisione e totogiina atu, e taua ai le galulue faatasi ma le Matagaluega o Tina ma Tamaitai faapea le Ofisa o Fuainumera Faamauina e faamautinoa faamatalaga o nei faamaumauga.

E fautuaina e le Komiti le Ofisa ina ia faamaioio faamatalaga o tagata malaga i atunuu mamao, e taua ai le galulue faatasi ma le Ofisa o Femalagaiga e faamautu nei faamatalaga. E tatau ona i ai se sootaga (link) a le Faalapotopotoga ma le Ofisa o Femalagaiga (Immigration) e faafaigofie ai ona iloa tagata penisione e malaga atu i atunuu mamao.

E fautuaina e le Komiti le Ofisa ina ia faia ni polokalame faalauiloa e faamalamalama ai i tagata matutua faamanuiaga o penisione, ina ia vave resitala e maua ai faamanuiaga aua e maea le tolu tausaga e lei resitalaina, e na o le tasi tausaga e mafai ona toe maua (claim).

**IUGAFONO:**

I le maea ai o ana iloiloga, ua faaiugafonoina ai e le Komiti e fautuaina le Fono Aoao ina ia faamaonia le:

**P.P.2020/2021 Nu 78, Lipoti o Faamatalaga o Galuega ma Tala o le Tupe a le Faaputugatupe o Faamanuiaga o Tagatanuu Matutua o Samoa mo le Tausaga Faaletupe faaiuina i le aso 30 Iuni 2020.**

**P.P.2021/2022 Nu 33, Lipoti o Faamatalaga o Galuega ma Tala o le Tupe a le Faaputugatupe o Faamanuiaga o Tagatanuu Matutua o Samoa mo le Tausaga Faaletupe faaiuina i le aso 30 Iuni 2021.**

**FOFOGA FETALAI:** Faafetai i lau afioga i le Taitaifono mo le tolaulauina o Fautuaga aemaise o le auiliiliina o la outou tapenaga ma la outou lipoti, malo faafetai.

Ou te tapa lau afioga i le Sui Minisita mo le tali a le tatou Malo.

**Afioga Hon LEOTA LAKI LAMOSITELE:** Faafetai mo lou avanoa. Ma le faaaloalo e tuuina atu ai tali e pei ona tuuina mai e le Komiti e faatatau i le mataupu ua talanoaina, o le Lipoti mo le tausaga faaletupe 2019/2020 ma le 2020/2021.

**Fautuaga 1:**

Ua fautuaina e le Komiti le Ofisa ina ia galulue faatasi ma sui o nuu(Pulenuu) ina ia lipoti mai faamaumuaga o numera o tagata maliliu, a tagata malaga i atunuu e mamao, ina ia faamautinoa le aofai o penisione e tologiina atu, e taua ai le galulue faatasi ma le Matagaluegfa o Tina ma Tamaitai faapea le Ofisa o Fuainumera Faamauina e faamautinoa faamatalaga o nei faamaumauga.

**Tali:**

Ua faamauina le fautuaga. O le a galulue faatasi le Matagaluega ma sui o nuu faapea ma Matagaluega talafeagai e pei o le matagaluega o Tina ma Tamaitai ma le Ofisa o Fuainumera Faamauina, e faamautinoa o lo o sao ma atoatoa faamaumauga i taimi uma.

**Fautuaga 2:**

Ua fautuaina e le Komiti le Ofisa ina ia faamaioio faamatalaga o tagata malaga i atunuu mamao, e taua ai le galulue faatasi ma le Ofisa o Femalagaiga e faamautu nei faamatalaga. E tatau ona i ai se sootaga (link) a le Faalapiotopotoga ma le Ofisa o Femalagaiga (Immigration) e faafaigofie ai ona iloa tagata penisione e malaga atu i atunuu mamao.

**Tali:**

Ua faamauina le fautuaga. O lo o i ai se sootaga vavalalata a le Ofisa ma le Ofisa o Femalagaiga (Immigration) ma o lo o i ai le faamoemoe e faamautu lenei sootaga e ala i se maliega autasi i le lumanai.

**Fautuaga 3:**

Ua fautuaina e le Komiti le Ofisa ina ia faia ni polokalame faalauiloa e faamalamalama ai i tagata matutua faamanuiaga o penisione, ina ia vave resitala e maua ai faamanuiaga, aua a maea le tolu tausgaas e lei resitalaina, e na o le tasi tausaga e mafai ona toe maua (claim).

**Tali:**

Ua faamauina le fautuaga.

**FOFOGA FETALAI:** Malo faafetai i le saunoaga a lau afioga i le Sui Minisita. O lea e i ai nai minute i se tasi o sui e fia saunoa i le tatou Lipoti.

E tuu atu le avanoa i lau afioga i le Taitai o le Itu Agai.

**Tofa Hon LAUOFO FONOTOE NUAFESILI PIERRE LAUOFO:**

Faafetai i lau afioga i le Fofoga Fetalai, o le a ou faaaogaina nai minute ia e totoe o le tatou fono, e avatu ai nai manatu ia e tasi pe lua e tusa ai ma le penisione a nai tagata matutua. O lea e matau atu, o lea sa talia ma le fiafia e le Taitaifono lau faatu atu, e sii i le tolu selau ia le penisione a nai tagata matutua. Ae taatia atu i le Komiti faatonu ma le pulega se i silasila ane i lena vaega, afai e mafai, ua matuai selau pasene. Malo faafetai.

O faamanuiaga, i le tulaga i le falemai, e vaai fua le fomai, ma maua fua talavai, o lo o faaauau pea, malo faafetai. E faapea foi i pasese o le vaa, ae le o aafia ai ia totogi o taavale. Ae ua toatele ia matua tausii i lenei foi vaitau, ua fai taavale, e faatau mai e alo ma fanau o lo o galulue i atunuu mamao, e faapea foi le au galulue faavaitaimi, o le mea lava lea tatou te matauina, e na ona foi mai lava faatau loa le taavale. O le a se tofa? Tatala se avanoa mo nai tagata matutua e ave ai a latou taavale i Savaii, e feoi, foi mai... Aua o le toatele lava o latou e agai mai e o i le falemai i Motootua, aemaise lava nai penisione i Savaii, e tatala i ai le avanoa lea. Afai foi e le tatala i malaga uma, ae amata i sina tolu malaga fua i le tausaga, i le amataga, faaogatonu ia faapea foi le faaiuga. Tuu ai se avanoa faapea, e malaga mai ai latou, e faaoga i ai a latou taavale. Aua o le mea lea, o lona uiga a sau mai Savaii, o lona uiga ona oso lea i lalo, ae tietie i luga, ae totogi e le fanau le pasese o le taavale. A o lea e omai le fanau e aumai le tina ma le tama i le falemai i Motootua. Silasila la i tulaga ia, se i silasila ane ma tagai i ai i malaga a nai penisione mai Savaii. E faapea foi penisione i Upolu nei e malaga i Savaii, aua foi ia feau faaleaiga ma faalavelave e feagai ai latou. O le fesili, e faafetai o lea e maua i suesuega a le Komiti ia tagata ia penisione malaga i fafo, ma latou ua maliliu, aua e pei e tasi lea faafitauli sa aliae mai i ia vaitaimi ua tea. Aua e tiga lava ona maliu le matua, po o la e malaga i fafo, ae la lava e tala e le fanau le penisione, e masalo e i ai atugaluga na o lea e aumai e le lipoti lea a le Komiti lea ou te vaai atu i ai.

Ae pau le fesili po o se fautuaga foi, se'i silasila la aua ua toatele a tatou tagata ia ou te vaai, e tali le penisione i Niu Sila, tali le penisione i inei. E le o i ai e fesootaiga a lo tatou Ofisa Penisione i inei ma Ofisa Penisione i Niu Sila. O le a se faatatau i lea tulaga faapea, o le tali o le Penisione i o, sau i inei tali le penisione. Aua o lea ou te faalogo e tapu i le va o Ausetalia ma Niu Sila ia le faiga lena, o le tali o lau penisione i Niu sila e le maua i Ausetalia, a ua tali i Ausetalia e le maua i Niu Sila. E na ona fai atu faapena se tala se i silasila i vaega ia i le tulaga tonu lea, po o le a se faiga i lena tulaga, pe o se faafitauli e tulai mai, pe leai.

Lau Afioga i le Fofoga Fetalai, atonu o lea ua tatou taunuu i le tatou taimi, faafetai mo le avanoa.

**FOFOGA FETALAI:** Malo faafetai mo le faasoa i lau Afioga i le Taitai o le Itu Agai. E leaga o lea ua ou vaai atu o lea ua tulai mai le sui usufono mo Siumu, o lea lava e i ai nai minute mo le sui usufono mamalu. Tulai mai lau afioga.

**Tofa Hon TUUU ANASII LEOTA (Siumu):** Faafetai mo le avanoa e le umi foi se mataupu. Ae ua ou tulai atu, e i ai lava nai mataupu, ae o lea ua saunoa i ai le Taitai o le Itu Agai, ou te lagolagoina ai foi le fautuaga e pei ona saunoa i ai. E pau lava le faafesili lau afioga i le Taitaifono, i tagata matutua ia e malaga i fafo e siimai, e tolu masina lea ua ave ai e le Malo ua faataga e le Malo e ave e fai se taotoga pe... ae foi mai, e le o maua, ua le maua ua taofi, fai mai o le tolu masina lea sa malaga ai ua le maua. Ae o se faafesili lena ma le faaaloalo lava i lau afioga, faafetai mo le avanoa.

**FOFOGA FETALAI:** Faafetai lava mo le faafesili, se i tulai mai Vaimauga 1.

**Afioga SULAMANAIA FETAIAI TAUILILI TUIVASA:** Lau afioga i le Taitaifono, o le itumalo lenei o le faataua ia o Komiti ma latou lipoti. O le tuualalo, o le Ofisa o tatou Fono Faavae o itumalo, e avatu ai se tuualalo i komiti, pe le mafai ona faaoga ifo ina ia agai atu i ai ma aumai ai faamaumauga ia. Aua o komiti ia o itumalo o lo o i ai fono faavae, o la e malamalama i tuua ua maliliu ma i latou, ina ia...e oo i le tulaga o le aoina mai o tagata faigaluega i NPF, e pei e i ai komiti ia o le itumalo i le fono faavae e faaoga atu i ai ona o latou e malamalama. O lona lua o tatou tagata matutua lea na saunoa i ai le taitai o lenei Itu. Ae o le tatalo a le Vaimauga, a tau loa tagata matutua e fia fai manuia uma lava, aemaise o lenei Palemene, pe le mafai ona faamatuu i ai ni faleaiga, aua o lea ua i ai le tulaga o fualaau. A i ai ni faleaiga e o e tausasami ai o tatou tagata matutua ona aumai lea o le lisiti e o ai e claim i le NPF. Ona o le tele foi o lenei vaitau i le taugata o le...e pei e faapena se manatu o le Vaimauga, ia i

ai ni faleaiga e tausasami ai, ia i ai foi ni taavale e o ai, ona omai lea toe tuu i le NPF, aumai le lisiti e toe claim mai ai le tupe lea e fealuai ai i le taavale a le LTA i le taxi laupasese ma pasi.

O le agaga lena lau afioga i le Fofoga Fetalai, manuia le Fono.

**FOFOGA FETALAI:** O la e faafogafoga mai le Taitaifono ma le komiti. Tulai mai le sui usufono mo Aiga i le Tai.

**Afioga AUUPAAU MULIPOLA ALOITAFUA MULIPOLA:** E momoli le faamalo i le Komiti e tusa ai o le lipoti e uiga i tagata matutua, e leai o tatou tina ma tama matutua. Ae o le vaega e tolu, ona lea e i ai le faaupuga lea faapea, faatino le polokalame faalauiloa e faamalamalama ai le resitalaina o tatou tama ma tina matutua ua aulia le 65 tausaga. O le faataua la ua maua ai so'u manatu ona o le upu mulimuli lea aumai le fautuaga o le claim. E masani lava ona ou talanoa ile tulaga lea o le mea lelei mo Savaii, e atagia foi le lelei mo Upolu. E le natia o lou motu Manono e feoi mai Tina ma Tama matutua. A o lau la tilotilo la i le fautuaga pe mafai ona tilotilo i ai le Komiti. O le upu moni lava e tataua ona siitia le penisone a tagata o lo'u Itumalo o loo i Manono Tai, leaga e leai se vaega e le gagavale le tautala i se agaga tautua a le Malo. Ae leaga o lea e tutusa Savaii ma Upolu i femalagai e leai ni totogi o vaa. A o le femalagai o tagata matutua, tama ma tina matutua ma le mamalu o le afaigaluega o la e faatupe a e latou tulaga ia penisini, e le tofua vaa uma foi lo matou motu a na tuutuu atu ona o le faataua lea o le upu mulimuli foi lea o le fautuaga claim. Lea foi na laga e le sui usufono o Vaimauga ae ou te manatu a tataua ona muamua ona faataua le claim o le transportation o lou motu lea mai tai Manono feoi mai ma le feoi atu ma le faafetai lau Afioga i le Fofoga Fetalai.

**FOFOGA FETALAI:** Ia ua tele a manatu i nai tagata matutua ae fuafua foi i le silasila foi a le tatou NPF ma le Komiti Faatonu. Ua i ai le manatu leaga lea ua tatou taunuu i le tatou taimi malolo. Ae a aulia le aso a taeao ona tuu atu lea o le avanoa i lau Afioga i le Taitaifono faapea foi le sui Minisita mo tali e tusa foi ma ni finagalo faaalua a sui usufono mamalu, ae malo faafetai mo le taumafaiga o le tatou galuega i lenei aso. Malo le onosai, malo le usufono, faafetai i Afioga Taitaifono mo le tapenaina o tatou Lipoti aemaise o taimi e tali atu ai i mataupu laga e sui mamalu faapena foi se faafetai i le paia o le Kapeneta mo Tali a le Malo i fautuaga tatou Komiti. Malo faafetai, faafetai atu i Ofisa Sili o Pulega o Matagaluega ma Faalapotopotoga Tumaoti faapea foi le tatou Malo, o outou faiva alofi aao o loo tua iai lo tatou maota, malo le onosai malo foi usufono. O le a tatou malolo, talosia ia le alofa o le Atua i le aso a taeao faaauau ai la tatou galuega.

Na o se faamanatu a le Fofoga Fetalai, o loo faaauauina pea nisi o polokalame taua a lo tatou Malo e pei ona taualamua ai Matagaluega o Tina ma Tamaitai, Atinae o Nu'u ma Afioaga ma Agafesootai mo le tineia o sauaga e faasaga i Tina ma Tamaitai ma Alo ma Fanau. O lea polokalame o loo faataua ai le laeiina o le laei uliuli i aso tofi o vaiaso taitasi, atonu o se tatou sao foi lea i le taumafaiga e tineia sauaga mo nai Tina ma nai fanau e talosaga atu ai i le Paia o le tatou Maota. Tatou laei uliuli mai taeao, o le agaga maualuga a tau solomua tatou Taitai e tutu i luma e uunaia ma lagolago polokalame faapea ona mautinoa foi lea le amanaia e le Atunuu aemaise ai le tatou fonu o lea ua faasalalau tuusao e maimoa mai ai le lalolagi atoa. O se molimau lea o le lagolago a le Palemene i le aveesea o nei faafitauli mai si o tatou atunuu.

Ae tatou te lei tolopo, e talosaga atu ma le agaga faaaloalo i le sui usufono mai Falelatai ma Samatau e na te saunia se tatalo e faamaea ai le tatou Fonu.

*Na tolopo Taulumaga a le Fonu Aoao Faitulafono i le itula e 1:02 i le afiafi seia aulia le Aso Tofi, 09 Mati 2023 i le itula e 9.30 i le taeao.*